

GUILTS NE GLO PXEEL PABL LO ZHA CORINT

¡Diuzh to grëse to! ¹ Naa nac Pabl, ible Dios bzooblo naa znu quiayun naa xtsiin Jesús. Grop no bets ne Sóstenes rquiaa guits rii rxeel no lo to.

² Laaw ziaad lo to i, grëse to ne nac to zha ne ngable xnëz Dios no to guiedz Corint i, nac to zha ne bredz Dios ngab lo me, psanmbe me to zeeñe laa to bliladz Jesús; zigne psanmbeque me grëse miech ne no dib lo guidzliu, zha ne bliladz Jesús, meñ ne rnabey ne grëse ne.

³ Dios meñ ne nac Pxoz ne, ni Jesús meñ ne rnabey ne, me gacniñ to, me glu lo to ganle pa lotaa noxco me to; zeeña peet tsienied guic to.

⁴ Gzataa zeeñe rzodiidznie naa Dios, rded naa xquizh lo me por grëtaa ncuaane zineedz me lo to, niina ne laa to rliladz Jesús.

⁵ Sac gon porne rliladz to Jesús, blactaa ziyunlay me lo xquielmban to, noyacniñ me to quiayogucraa to zha nac zhiwseed me, rien to zha gnee tow lo miech.

⁶ Rlu zianal to miñe nac Xtiidz Jesús, zigne binse tow,

⁷ gacxe waa bneedz Dios grëtaa guielbiini lo to, zeeña guien to zha gban to, laga quiambëz to gdziñ dze ne guiaad Jesús meñ ne rnabey ne.

⁸ Ni Dios nac meñ ne gacniñ to tiblifique gac to lo Xtiidz Jesús, zeeña ni tib falt rapde to gal dze co.

⁹ Sca nac xtiidz me, ni mesi gon ctsëed me mine rnee me, ible laa me bredz to gacnie to Xpëed me Jesús, men ndzon ne rnabey ne.

¹⁰ Gacxe waa bets, bzian, laa naa rso diidz lo to niowse golgac, tsodildraa to. Ine tipse golgac grë to, tel pe nac dziin ne gun to, tel pe rzac to, tipse golnee. Ne nligaa golgona, zig nac zeene Jesús zhal noso diidz rii lo to.

¹¹ Sac gon në tib zhalidz Cloé lo naa nodillsa to i;

¹² no to dien cho xnëz ngab to. No to rnee: “Xnëz Pabl no naa”; riasaque zha ne rnee xnëz Apol no zho, rrieequiagaa zha ne rnee xnëz Pedr no zho; haxta no zho rzac zhase nac zha ne nlipaa no xnëz Jesús.

¹³ Ne squi rac to, ¿pe rzac to dzigo squi nzian lë nac Jesús? Zha ne rnee xnëz Pabl no zho, ¿pe niacxe naa pquia lo cruz gozh xtol zho?, ¿te brobnis zho ye par ygab zho lo naa?

¹⁴ Xquizh Dios led naad pchoobnis to grë to, lëese chop zha ne pchoobnis naa nac Crisp ni Gay!

¹⁵ Zeena tsod pe nacne guiab to xnëz naa ngab to, sac naa pchoobnis to.

¹⁶ Ah, ni naaque gon pchoobnis grë menlidz Stef. Bod lëese zha ne pchoobnis naa ga,

¹⁷ sac gon pxeeldaxe Jesús naa waa cchoobnis naa miech, sinque laa me pxeel naa cseed naa zho gacnan zho zha grieelo laa zho lo dol. Haxta bod ligase bzhaac to mine bialne naa lo to, sac ib zanaid naa pe guielrac, pe diidz ngan ne gne naa; sac nacda gleynie miech zha rnee naa, sinque gliladz zho cho nac Jesús, pe nacne gut me lo cruz.

Diosse nac men ne rien

18 Min co nagon noxco naa, maase niicle no grë zha ne rzac ncuaane paat rquiind ga been Jesús gut me lo cruz, per lëe zha co nole nëz ne nitlo zho; sangue ne ne nac ne zha ne psilaale me lo dol, ndion ne ganle ga blu pa lotaa nac poder ne rap Dios.

19 Noyaca zigne zhobneeque lo Xtiidz Dios, zeene rëb me:

Znitlo naa grë guielrac ne rzac zho csilaa zho, niicle rzac zho mazdraa zhooba guic zho, ni lalnu yquiinda.

20 Ni nligaaw, grë zha rac, grë zha rien, grë zha ne rzob dien cho nroobraa rac, ib blud grë zhiwseed zho ga lo zho zha csilaa Dios zho, chogaa nac Dios. Ga blu Dios ganle lega nacse grë guielrac ne no lo guidzliu rii.

21 ¡Diosse nac men ne rien! Bien me grielod gunbey miech me por xquielrac zho, nacne bnabey me zha ne dib zdoo gliladz xtiidz me, zha co csilaa me; niicle ne rzhidznie miecha, rzac zho ncuaane paat rquiinda.

22 Zig nac grë zha Israel, grë zha Gres ncuaane paat rquiinda rzac zho. Grë zha Israel, racladz zho ganlo zho grë milagr nroob par glu ne diidzliw; laa zha Gres na zienalgaa gaca zigne nac zhiwseed zho, sac laa zho zienal guielrac ne no lo guidzliu rii.

23 Gacxe waa zeene rnee no lo zho Jesús men ne pquia lo cruz, men cose csilaa miech, rlëe zha Israel ron zhow; laa zha Gres, rzhidznie.

24 Sangue ne, ne nac ne zha ne bredzle Dios bzëeb xnëz me, zigtaa zha Israela, zigtagaa grëraa miecha, ndion ne ganle Jesús nac men ne biaadlu

pa lotaa nac poder ne rap Dios, me biaadlu pa lotaa nac xquielrac Dios.

²⁵ Mine rzac miech paat rquiind ga been Dios, ni nanđ zho ndziibguicraa nac min co lo grē xquielrac zho; zha ne rzacгаа cholze cho men nsis ga sca gut lo cruz, ni nanđ zho lēē men co mazdraa ndip lo grēse miech guidzliu.

²⁶ Bets, bzian, golgan ganle lo grē to ne nac to zha ne ngab xnēz Dios, led grēde to nac zha rien nēz lo miech, led grēde to nac zha non, zha ne ziaadгаа lo grē dii ne nziuu lo zho.

²⁷ Per ib laa Dios nobedz grē zha ne rzac miech peet riend, grē zha ne rzac zho nac zha nsis, parne gunctoladz me grē zha ne rzac zho nac zha rac, zha non.

²⁸ Laa me nobedz grē zha ne sca rzac miech paat rquiin, zha ne rzac zho peet nond, parne guioog ro grē zha ne rzac zho nac zha non, zha nziuu.

²⁹ Ga rlu me ganle ni tib choot grieelod gacniats lo me.

³⁰ Golwi ganle, niapse por me laa ne nacie Jesús, grē guielrac, grē guielrien ne rdziaap ne, Jesús bneedza, ni Jesús nac men ne psilaa ne lo grētaa xtol ne, men ne psanmbe ne laa ne bziaab xnēz Dios. Dios bnabey sca goca.

³¹ Gacxe waa choot grieelod gacniats, zigne ziaadaque lo Xtiidz me zaatne rnee: “Zha ne racladz gacniats, mazd gunnon zho Dios por grētaa ncuaaņe ruņ me.”

2

Xtiidz Jesús bnee Pabl

¹ Gacxe waa tel naa, golsoladz ganle bets, bzian, len dze ne bialseed naa to Xtiidz Dios, bned naa dien pe diidz nroob, dien pe diidz ndzielguic lo to.

² Bend naa dien peraa nseed naa to, sinque mine nac zhiwseed Jesús min co bialne naa, zeena gacnan to cho nac me ni pe nac ne pquia me lo cruz.

³ Lega gzhe gzhe rac naa, haxta rzhidz naa, rdzieeb naa no naa lo to.

⁴ Zeene laa naa psilo bne Xtiidz Dios lo to i, gon to ganle ib bned naa zigne rnee grè zha ne nac zha rac lo guidzliu rii; per blu Espiritu Sant ganle nacda beelze pe wseed, ni blu ganle pa lotaa poder ne rap Dios.

⁵ Sca bne naa lo to, sac laa naa racladz zha ne gbig sëeb xnëz Dios, me gnalo zho, gnalod zho grè mine nac xquielrac miech.

⁶ Parga nli no zaatne rnee no grè diidz nroob, diidz ndzielguic, per laa min co rnee no lo grè zha ne rienraa zha nac Xtiidz Dios, ni nacdgaaw zigne nac grè xtiidz ndzielguic grëraa miech, grè diidz ne rleyne grè zha rnabey ne no lo guidzliu rii; sac zigtaa zhaw, zigtagaa zhiwseed zhow, ncuane tibrded naca.

⁷ Grè diidz ne rnee no, ndzielguic naca, sac zhiwseed Diosa, lëë xquielrac me ga. Ndzielguica, sac ga rlu me zha no guic me csilaa me miech gdzin zho lo guielndzon ne no me; gocnand miecha padzeela, per nolew zeene bzaa me guidzliu.

⁸ Grè miech ne no len dze rii, rioguidc zho zha nac xquielrac Dios; sac telne nioguidc zhow nabeyd zho nquia men ndzon ne nac Jesús ga lo cruz.

⁹ Zigne zhobneeque lo Xtiidz Dios, zaatne rnee: Ncuane wlaltaa gard guien miech,

nac grë miñe quianiele Dios gdeed me lo grë zha ne nlipaa gbig lo me gleynie zho me.

Ncuaane choot gard gana, ncuaane choot gard gona.

¹⁰ Sangue no laa no ndionlew, sac pxeel me zhiEspíritu me blu lo no zha naca, meñ co nan grëse miñe no guic me.

¹¹ Zig nacse tib miech, grieelod gacnanpaa ne dien pe nac miñe no guic zho, pe nacgaa miñe rza zdoo zho, loxaque zhiespírituse zho nana; scaque Dios, loxaque zhiEspíritu me nan grëse miñe no guic me gun me.

¹² Ni tel no, Espíritu co nacie no (nacnied no espíritu ne quianzê lo guidzliu rii), ni ible laa Dios pxeel me lo no zeena gacndion no zha nactaa grë ncuaane nole guic Dios gneedz me lo ne.

¹³ Zeene rzeet no grë guielnzaac co, laa no rneew zigne rneedz zhiEspíritu me guielbiini lo no, rneed now zigne riab guic grë zha rac ne no lo guidzliu rii. Laa no rnee grë miñ co zigne rlu zhiEspíritu mew, ni ible laaw nac par grë zha ne rioguicle zha racladz Espíritu co.

¹⁴ Grë zha ne nacnied zhiEspíritu Dios, cholze miech nac zho, grieelod tsoguic zho zha nac grë miñe rlu Espíritu co lo no. Rzac zho ncuaane paat rquiind naca, sac grieelod guien zhow ne zhase.

¹⁵ Sangue zha ne rioguicle zha racladz Espíritu co, rien zho pe nac miñe rlu me.

¹⁶ Ni nligaa zha guien zhow, zigne zhobneeque lo Xtiidz Dios, zaatne rnee: “Choot grieelod gacnan pe nac miñe no guic Dios gun me, choot grieelod glu lo me pe nac miñe no gun me.” Per

no, ndion now, sac grë ncuaane nan Jesús, bneedz me diidz lo no ye no gocndiona.

3

Gnalod zho samiech zho

¹ Bets, bzian, ne nligaa gard grieelo gne naa lo to zigne rne naa lo grë zha ne rioguicle zha nac mine racladz zhiEspíritu Dios, sinque tibaque laa naa rne lo to zigne rne naa lo grëraa miech guidzliu, sac rriequia bii mëdyeen nac to lo zhiwseed Jesús.

² Niapse ncuaane ligase ziseed naa to, laa ne cseed naa to ncuaane ndzielguic. Rriequia nidzse nonedz naa quiaye to, laa ne gow to grë ncuaane row zha gol. Haxta niinagaa gard tsoguic to zha nac grë mine ndzielguic,

³ sacne laa to bii zienal mine run miech guidzliu, laa ne gun to mine racladz Dios. Golguien ganle zha rac to, no to rlozhd glëëlsa to, rlozhd tillsa to. ¡Led squid gon no gac zha ne nole xnëz Dios!

⁴ Pe i na rree bla to rnee: “Tel no xnëz Pabl no no”, rriequegaa zla zha ne rnee: “Tel no xnëz Apol no no.” Gase rlu ganle zienalde to mine racladz Dios, sinque laa to zienal mine no guic to.

⁵ Nana, ¿cho nac Pabl, chogaa nac Apol parne no yquiaaqui tsodil to? Nli no biadseed to Xtiidz Dios, per tib ngundziin winse nac no lo me, bdziuun no mine rnabey me no.

⁶ Nac cuent rii zig nac tib guielgon, naa blo bni liu, laa Apol bgaala; per Dios nac men ne bnabey blana ni me pchooba.

⁷ Golwi sca ganle Diosse nac men non, sac me pchoob bni co, tel no peet ncuaane nroob bdziuun no, lëë gdib tib bloo bni liu, stib bgaala.

⁸ Zigtaa zha ne bloo bni liuw, zigtagaa zha ne bgaala, lal nac zho grop zho; ni Diosse nac men ne gdeed miñe rieguañ zho tib tib zho por dziin ne been zho.

⁹ Tib ngundziin winse nac no lo Dios grop no Apol; laa to nac zig tib lë liu ne quiayan Dios, zig tib yu ne quiazaagaa me.

¹⁰ Pa lotaa wen Dios, sac bzooblo me naa naa psilo yu co, ni blu me lo naa zhapaa none tsaaw. Nli naa bgaa blee xcimienta, per niina zhaale zha ne nosoquiaw. Tib tib zha ne nosoquia yu co, none guiñ zho zaacse gzhixcuaa zhow, tsienal zho zigne nacse xcimienta ga,

¹¹ sac goñ nod pe nacne csëeb zho stib cimient, tibaque cimient no, lëë cimient co nac Jesús.

¹² ¡Laa cimient co nole! Nana no zho gzaa yu co niapse guiib or, niapse guiib plat, no zho gzaaw grë quie niazh, no zho gzaaw yag, nogaa zho gzaaw grë pe guizh, pe yag xiidgaa.

¹³ Zeene gdziñ dze ne laa Jesús guñ guieñwxtis, ga glu dien zha nac xtsiñ zho; sac gal dze co grësew laaw none ted lo gui, ga glu dien pa min lëbraa.

¹⁴ Zha ne pquiin ncuaane rlëb lo gui, ib tedsod zgaa zho miñe rieguañ zho gdeed Dios lo zho;

¹⁵ laa zha ne pquiingaa grë ncuaane znuse rec, mbe scase nitlo xtsiñ zho. Peet ycaaniad zho, haxta zha pense tel zha laa zho lo gui co, zigne rzac zha ne rec lidz.

¹⁶ Golgacnañ ganle xyadoo Dios goñ nac to, sacne zdoo to rbëz zhiEspíritu me.

¹⁷ Tel xyadoo Dios, tib yadoo mbe, tib yadoo nda naca; gacxe waa, zha ne gnitlow ib tedsod znitlo Dios zho.

¹⁸ Golguien sca zaacse golgac, tel no zha ne rzac nroob rac zho wseed lo guidzliu rii, gnalod zho min co; nend lel lo co no zho, ygaad zho mine nacpaa guielrac, guielrac ne rneedz Dios.

¹⁹ Sac gon gre guielrac ne no lo guidzliu rii, ncuaane beelze naca nez lo Dios. Zigne raquiteaque lo Xtiaz me zaatne rnee: “Gre zha rac ne no lo guidzliu rii, leequel lo gre guielrac ne zienal zho, ga rlu Dios ganle paat rquiinda.”

²⁰ No stib zaatne rnee: “Nanle Dios gre zhgab ne nonie guic gre zha rac, ncuaane paat rquiinda.”

²¹ Tsode to sca lozhd gacniats to dien cho xniz miech guidzliu rii no to, golguien ganle gretaa ncuaane no, laa Dios psana par yquiina lo to.

²² Zig nac guidzliu, guielmban, guielgut, ladznia to now, niicle ncuaane no niinaw, ncuaane nara-gaa ziaada, chen tow; haxta Pabl, Apol, Pedr, ib laa no zo nu par dziuun no xyudar to.

²³ Grese to tibaque xniz men ne no to, lee men co nac Jesus, men ne pxeel Dios.

4

Zha rzac zha ne rienee xtiadz Dios

¹ Golguien sca tib moz winse nac no lo Jesus, laa me bzoo no noseed no miech xtiadz me mine gocnand miech padzeela.

² Ni zha ne gon znu run tib dziin, ible none nguzobdiadz gac zho lo men ne rnabey zho.

³ Gacxe waa tel zha rzac to naa, tel zha rzacгаа greaa miech naa, peet zienied guic naa. Haxta ni mine rzaac naa nac naa, peet nonda, rieguald guiep naa znutaa znutaa nac mine noyun naa.

⁴ Nli peet dzeb nonied guic naa guiep naa nend cho pe glisqui lo naa, per led mincod gni naa ni tib dol rapdraa naa; loxaque Dios nan zha nac naa, me gneedz mine gagual naa.

⁵ Gacxe waa, gunde to ne glole to guiab dien cho nac zha ne wenraa; sac min co gun men ne rnabey ne gal dze ne laa me guiaad. Gal dze co, me cxobnen ganle zhapaa nac ne tib tib ne, haxta gre mine rza guic ne, mine no zdoo ne, laaw glu me; gre no ne nodziun no xtsiin me, dze co laa me gneedz mine riogualpaa no tib tib no.

⁶ Bets, bzian, niina ne nozet naa no lo to nu grop no Apol, quiayunnond naa naa, niicle nosanwindgaa naa me. Ga sca ganle golwi, zeena cseed to gban to zigne nac Xtiidz Dios, tsoode to lozhd dien cho non, chogaa nond.

⁷ Stiba, ¿cho nadien ne lo to ne gunnon to to? Gre ncuane rap to, gre ncuane rac to, ¿niacxe led Diosd bneedza lo to? Dios name bneedza lo to, ¿pe nac dzigo no to rlozhd gacniats to zig nac zeene por xquielliger to bgaa tow?

⁸ Niats rac to, masaque rzac to grele zhiwseed Dios nan to, gaxle zo to lo me, haxta rzac to tole nac zha rnabey, paat rquiindraa no. Wenzhe tebaa nligaa zha rnabeyle nac to, zeena haxta ye no zley no.

⁹ No hor rzaac naa, diunavez win psan Dios no ne nac no zha ne nonee xtiidz me, loxaque lo no rwi miech, rwi gre anjl dien zha rac no; zig run miech rieso zho lo zha ne rnabey zho ret.

¹⁰ Ne znu quiadziun no xtsiin Jesús, masaque zha yozh nac no lo miech, laa to gon xquizh me zha rien nac to lo zho. Zha nsis, zha zozhidzle

rzoob zho no, laa to zha ndaan, zha ndip nac to. Masaque zha nziuu nac to lo zho, laa no rzac zho ni gaṇd zho lo no.

¹¹ Haxta lo nadze blactaa zaatne retgbin no, zaatne retnis no, per ni lidz no, per ni lar ne dziaacw no guiend, rdib rdzaag no rdziuuṇ no dziin rdziniaa no ncuaane rquiin no.

¹² Ni rlozh ga rrieque miech rsacsi zho no. Rriequia zha ne rdzibdee no, per rdziuuṇd no gdzibdeequē no zho, sinque mazd rnab no lo Dios guṇlay me zho; zha ne rtsidil no, rdziuuṇcasd no zho.

¹³ Rriequia zha ne nē rnee lo no, per no, diidz wen rtsire no lo zho. Masaque rzac miech no, zig rzac zho grē ncuaane paat rquiindraa, zig rzac zho grē ncuaane nole lo guizh.

¹⁴ Laa naa rzet grē miṇ rii lo to, per nacda par guṇctoladz naa to, sinque laa naa rzeta zeena guien to zaacse gac to, golguien gaṇle rleynie naa to, rzaac naa to zig tib xpëed naa.

¹⁵ Niicle niaca mine ndal zha ne guiadseed to i, niicxe guiaad nzian mil zho waa, per led grëd zho tsoxcopaa to zig rioxco tib dad xpëed zho. Zigne rne naa ga, xpëed naa nac to, rriequia pxoz to nac naa, sac goṇ naa glo bialne xtiidz Dios lo to, laa to bzëeb xnëz Jesús.

¹⁶ Goltsoxco sca, golban zigne mban naa.

¹⁷ Ni ible mincopaa goṇ laa naa rxel Timoté ziaad lo to i, lëe stib xpëed naa i, ne nligaa rleynie naa me, tib zha nguzobdiidz nac me lo meṇ ne rnabey me. Laa me ziaad i, me gzodiidz lo to gaṇle zigne rseed naa miech grëse zaatne ziyateed naa, scagaa noxco naa mban naaw.

18 Rien naa no bla niats ne nac to i, rzac nlidraa guial naa lo to i stib.

19 Gacnan zho ganle, gneedzse Dios diidz, ible laa naa none guialniob, dzigo bii zdziañ ne dien pe nli na nacie zho xpoder Dios, te loxaque rnee zho ye.

20 Sac gon zha ne ngab xnëz Dios, grë minë rnee zho none glu nacie zho xpoder me, nacda loxaque diidzse.

21 ¿To nadien zha racladz to? ¿Pe rdziladz to guial naa guialgactox naa lo to i, te mazd wen ye niapse diidz ndooladz, diidz nex guialne naa lo to?

5

Zha ne runctal xtol

1 Zëeb diidz gon, lad to i no tib zha bgui ne quiayun tib dol nroob; per ni grëraa miech ne gard gliladz Xtiidz Dios rund min co. Bin naa lëëque xnïaa pchoob zho quiangob zho.

2 ¡Yo na ne rzac to grële zhiwseed Dios nan to, gaxle zo to lo me! ¡Laa ne ctoladz to, laa ne tso to guielnë, cuee to zha qui lad to, lel no to rlozhd gacniats to!

3 Niicle ne zozhaald naa lo to i, per zeene bin naaw tibaque nonie guic naa zha gaca. Nu laa naa gni lo to ganle zha riegual gac zha co:

4 Grë to ne nac to zha ne ngab lo Jesús, rnab naa lo to ycaalsa to zigne rnabey me. Ndiönle ne ganle zeene laa to ycaalsa, ga zo Jesús lo to, scagaa naa, golgun cuent lo to i zo naa.

5 Squi ndxie to grë to, golzonëz zha co, golcueegazh zho lo to i, tsie zho tsietsobe zho ladznia mendox, ga tednë xcuerp zho guien zho

ganle pe noyūn zho; nan̄d new togo zzhixcuaa zho stib, zeena ycaania Jesús zho gal̄ dze ne laa me gbiire guiaad.

⁶ ¡Xlèse gon̄ squitaa racniats to rzac to zha mbe nac to, ni randze to zha ne quiayūn dol̄dox qui! ¡Pe riende to tel̄ne glisqueide to min̄e quiayūn zho, ib tedsod zrieequiaraa zha ne squi gun̄ctal xto!!

⁷ Zha ne squi nac, masaque nac zho zig nac grē guiel̄guidzdox ne znuse rd̄ed; gol̄c̄ueegazh zho sca, zeena in̄e mbe gac to n̄ez lo Dios, tete to guiel̄guidz qui. Gol̄guien̄ ganle laa Jesús psan̄mbele ne, min̄copaa gut me, goc me gon̄ n̄ez lo Dios zig carner yeen̄ ne rgogon zho lo me lni Pascw.

⁸ Gol̄gotsaa gban ne zigne racladz Dios, gr̄ese tel̄ zha wban ne glo, gr̄ese guiel̄yozh, gr̄ese guiel̄ntseeb ne bdziūn̄ ne, none csaan new gr̄esew. Ndzinli sca gol̄gac, gol̄tsienal̄ min̄e nac diidzli; none mbe gac to n̄ez lo Dios, zig guietxtil ne notsd ncobi.

⁹ Lo stib guits ne pxel̄ naa lo to ga, laa naa psole diidz lo to ganle ctsieelsade to grē miech yozh ne ndzinlid mban.

¹⁰ Zeene sca pso naa diidz lo to, guiabde to togo naca parne ctsieelsadraa to grē zha ne gard gliladz Xtiidz Dios, zha ne rquiangob zha ne led tsieeld, grē zha ne zienal̄ loxaque gun̄lo dimi, grē zha ne run̄ guiel̄gbaan, gr̄egaa zha ne rnalo grē mdio. Led zha coda, sac laga mban ne lo guidzliu rii, ible zan̄lsa ne grē ne zho.

¹¹ Sinque zha ne bzet naa ga ctsieelsade to, nac zha ne nacle diidz xn̄ez Dios no zho, ni noque zho quiayūn̄ctal zho xto! zho, no zho rquiangob zha ne led tsieeld zho, no zho zienal̄ loxaque gun̄lo dimi, zhiga zhiga laa ne gleynie zho Dios lel̄ zhaa

ncuaane rleynieraa zho, no zho rquiadiidzguizh samiech, no zho rzudz, nogaa zho run guielgbaan. Ne nligaa zha ne sca nac, per ni tib guielwagw gawniede to zho.

¹² Tel grëraa zha ne gard gliladz Xtiidz Diosa, led ned rioguaıl glisqui mine quiayun zho, Dios nac men ne gunquizh zhow.

¹³ Saņgue zha ne nacgrë ne, zeene noyun zho tib ncuaane ndzinlid, ib rioguaıl glisqui new lo zho. Gacxe nana sca, zha ne squi quiayunctal xtol i, golcueegazh zho lad to, ni spalal gandzedraa to zho.

6

Zha none gac guielwxtis

¹ Laa to gocnanle ganle, to rioguaıl glisqui tel pe nac ncuaane nonguield run zha ne nacgrë to. Lëda i gon run to, zeene pe tib dil rap to, lëëlëd zie to lo wxtis laa ne gbig to lo zha ne nacgrë to, zha csiooglo lo xtil to.

² ¿Niacxe nande to zha ne ngab xnëz Dios, zha co cobey zha nac xtol grëraa miech zeene gal dze ne laa Dios gnabeya? ¿Pe nac dzigo grieelod tose csiooglo lo tel pe dil win ne rap to?

³ Haxta grë anjl name, ne gon cobey pe nac grë mine quiayun zho. Gacxe waa, grë dil ne rac lo guielmban rii, ne rioguaıl cobey zha guiooglo low.

⁴ Sca gon gun to, led node to, rnadse pew laa to ziele lo wxtis.

⁵ ¿Pe ni tib lë guielto guiend lo to? Lo grë to, ¿niacxe goon guiend zha ne grieelelo gnee lo to, cuëz lo xtil to?

⁶ Nazdpaa rdziladz to dil, ¿pe i na lëëque zha ne nacgrë to quiadilnie to, ni rlozh ga zieque to zienie to xtil to lo zha ne riladz Dios?

⁷ Pe riende to tib guieltodoxle i squi no to lëëque to quiadilla. Mazd golxecw tel cho pe run to.

⁸ Mazdraa gon mbana squi no to rsacsi to miech, ni haxta zha ne nacgrë to rsacsi to.

⁹ Nanle to ganle zha ne squi run guielntseeb, grielod gdziñ zho zaatne rnabey Dios. Tsieniewguite guic to sca. Golsoladz ganle grëse zha ne run guielyozh:

zig nac zha ne rquiangob zha ne led tsieeld zho,

zig nac zha ne rquiangob zha ne nole tsieel,

zig nac zha ne nac mrazh,

zig nac zha ne rnalo grë mdio laa ne gnalo zho

Dios,

ni tib zho grielod gdziñ zaatne rnabey Dios.

¹⁰ Scaque:

zha ne nac ngbaan,

zha ne zienie guic loxaque dien zha gunlo dimi,

zha ne nac ngonziu,

zha ne rzhixcuuaa diidzguizh,

zha ne rungüet miech par cuan zho zho;

ni tib zho ygaad guielnzaac co.

¹¹ Blalaa to bio lo grë dol co glo, sangue niina miech mbele nac to nëz lo Dios, laa Jesús ni Espíritu Sant psanle to zig tib zha ne peet xtold, laa me psanwenle to nëz lo Dios.

Gunctald zho xtol zho

¹² Nli ndal ncuaane zac gun ne, gunctalda xtol ne, niicle choot rcadgaaw, per led grëda rquiin. Tel naa, niicle no ncuaane zrieelo gun naa, per rund

naaw; sac racladzd naa guien naaw, lozh ga lëew gnabey naa.

13 Zëeb diidz rnee zho: “Laa guielwagw biaan par gow miecha, scagaa zdoo zho laaw biaan par tsodzëw guielwagw.” Nli scaw, per guiabd ne togo por min co lega gowcho ne. Pa rquiin ne lega tedso gow ne, sac gon zigtaa zdoo new, zigtagaa guielwagwa, zdziñ dze ne gnitlo Diosa. Guielwagw ga na, sanque grë guelyozh nerun miech rquiangob zho zha ne led tsieeld zho, biaan ne par dziuun ne min co, sinque laa ne biaan par gban ne zigne rdziladz Dios, sac me rnabey ne.

14 Tel new nitlod ne, sac gon zigne bleeban Dios Jesús con poder ne rap me, scaque zbeeban me ne zeene laa dze co gdziñ.

15 Golgacnan ganle, rrieequia lëe tiblë xcuerp Jesús nu gon nac ne tib tib ne. Nana, ¿pe nonguiela ga dzigo gdzieel tib lë xcuerp me ga xcuerp tib wnaa ro nëz? ¡Nonguielda gon!

16 Sac gon zha ne raanie tib wnaa ro nëz, rrieequia tibaque rac zho ga grop zho wnaa co. Rnee lo Xtiidz Dios, par me: “Zeene laa mgui racgrop tib wnaa, tibaque miech rac zho ga grop zho.”

17 Scagaa zha ne rzëeb xnëz Jesús, tibaque rac zho grop zho me, zhiEspíritu me racnie zho.

18 Gacxe waa, gunde to guelyozh yquiangob to zha ne led tsieelde to. Lo grë dol ne no, min riise nac mine xcuerppaa miech rguitnie zho. Sac gon zha ne run guelyozh co, masaque rsanbeed zho zho ga.

19 Golguien ganle, zha ne nole xnëz Dios, masaque zha nac zig tib yadoo zaatne rbëz Espíritu

Sant, Espíritu ne rdeed Dios rbannie zho. Led nedraa rnabey xcuerp ne,

²⁰ Diosle rnabeya, sac gon bzhiile me ne ni nroob gocnon ne lo me. Gacxe waa, zigtaa xcuerp new, zigtaa xpensar new, gotsaa yquiin new par cxobnen ne ganle pa lotaa men nroob nac me.

7

Rtsire Pabl lo zhiwnabdiidz zho

¹ Lo guits ne pxeel to lo naa, nzian ncuaane rnabdiidz to, nu ganle laa naa ctsire lo wnabdiidz co: nli wena, telne niaca mine grielow ctsieelniad ne.

² Per parne tsod pe yquiaaqui cho gon guielyozh, tsonie zho zha ne led tsieeld zho, mazd wena zigtaa mguiw, zigtaa wnaaw ctsieelnia zho, tib tib zho gbanniese zho tsieel zho zigne rieguiala.

³ Zha ne ptsieelniale, zig nac mgui none gnee zho lo tsieel zho zeene racladz me, scaquegaa wnaa zeene racladz tsieel zho gnee lo zho none siguiel zho.

⁴ Sac gon wnaa ne rtsieelnia, led zhadraa rnabey xcuerp zho, sinque tsieel-le zho rnabeya; scaquegaa mgui zeene laa zho rtsieelnia, tsieel-le zho rnabey xcuerp zho.

⁵ Golguien sca, niicle mguiw niicle wnaaw nodne yca zho xcuerp zho lo tsieel zho. Laa telne rzacgaa zho none yquiind zho tsieel zho tib blalaa dze, sac rquiabladz zho gzodiidznie zho Dios, wena totsaque guiaan zhow diidz grop zho. Per zigne ted ga, gbiireque gnee zho lo tsieel zho, sac gon zha ne grielod cxecw, nend ccheep mendox zho gon zho guielyozh.

⁶ Ne znu rne naa lo to, guiabde to nagon togo rne naa nopaa ctsieelnia to.

⁷ Tel naa, rzac naa wena tebaa grëse to znu ctsieelniad, zigne nac naa; per na ncuaane gacd ga, sacne zhaase zhaase nac ne tib tib ne. No zho pso Dios ctsieelnia, nogaa zho pso me ctsieelniad, per rley zho mban zho zigne nac zho.

⁸ Zig nac grë zha ne bii tib, grëgaa zha ne gutle tsieel, wena tebaa grieelo scase guiaan zho,

⁹ per telne rien zho lëbd xcuerp zho, dzigo mazd ctsieelnia zho. Mazd wena ctsieelnia zho, lëdle so zho tib zho ni tel rec rdzu zho.

¹⁰ Sangue zha ne ptsieelniale, laa naa rso diidz lo zho csaand zho tsieel zho, ni nacda xtidz naa, sinque ible sca rnabey Dios.

¹¹ Laa tel zha ne guiaabgaa csaan zho tsieel zho, zaca, per lëëraasi grieelodraa gbiire ctsieelnia zho, mazd miñe naca telne zrieelow ycatsieel zho stib, o guiaangaa zho tipse zho.

¹² Nu na ganle laa naa gnegaa chop lan xtidz naa lo zha ne led yed tsieel rliladz Xtiidz Dios; tib diidzse naca gni naaw, nacda miñe rnabeypaa Dios. Zha bgui ne mbannie tib wnaa ne rliladz Xtiidz Dios, per telne rio guic wnaa gbannie wnaa zho, nodne csaan zho wnaa.

¹³ Scaquegaa wnaa ne mbannie tib mgui ne rliladz Xtiidz Dios, nod csaan zho mgui co telne riopaa guic mgui gbannie mgui zho.

¹⁴ Zigtaa mguiw, zigtagaa wnaaw, zha ne sca mbannie tib zha ne rliladzle xtiidz Dios, ye zho runlay Dios ga, nenda haxta zio dze ne ye zho gliladz xtiidz me. Sac telne ctso zho, laa ne gbigraa xpëed zho lo Dios, lel znu sozit mëed.

¹⁵ Nana, tel_{ne} zhalgaa zha ne riladzd Xtiidz Dios ga, rnab csaanlsa zho, peet nacda maase ctso zho, nod pe nacne gzoobguicpaa tsieel zho lo zho cuëz zho. Sac gon_z zha ne riladzle Xtiidz Dios, laa me bredz zho parne zaacse gban zho, bredzd me zho par tsodil_z zho;

¹⁶ stiba, nan_d zho dien_z pe zdzi_n dze ne giladz tsieel zho Xtiidz Dios.

¹⁷ Mi_{ne} naca tib tib to go_ltsoxco gon_z to mi_{ne} rdziladz Dios. Zigtaa zha ne pso me ctsieelnia, zigtagaa zha ne pso me scase guiaan_z, sca none gac to; scagaa zha ne ncaatsieel-le zeene riladz zho xtiidz me, none sca guiaan_z zho niicle tel_{ne} riladzd tsieel zho xtiidz me. Grëse zha ne ngab lo me, diidz rii rso naa lo zho.

¹⁸ Zig nac grë zha ne nole bey xcuerp zeene laa zho rzëëb xnëz me, sca no zho bey co gund_z zho ne yqueets zhow. Zha ne na nodgaa bey co zeene rzëëb zho xnëz me, scaque nod pe nacne tsopaa zho bey co.

¹⁹ Mi_{ne} mazdraa non lo me, gban zho zigne rdziladz me, guien_ddraa ne dien_z cho no bey, chogaa nota.

²⁰ Zigne rneque naa ga, grëse zha ne rzëëb xnëz Dios, tel_z zha nac zho zeene laa me bredz zho, scase none guiaan_z zho.

²¹ Zig nac zha ne nac ngundziin lo ben_z, peet tsienied guic zho guiab zho dien_z zha gree zho ladznia zha ne rnabey zho; per tel_{ne} gdeeda diidz, zac tsoxco zho dien_z zha gree zho lo zha co.

²² Zha ne sca nac ngundziin lo ben_z zeene bzëëb zho xnëz Dios, guien_z zho gan_{le} rrieequia zonlaale zho, sac gon_z laa Jesús psilaale zho lo grëtaa dol_z

ne bio zho. Zha ne nacdgaa ngundziin lo ben zeene bzëëb zho xnëz Dios, guien zho ganle tib ngundziinle nac zho lo Jesús niina, me rnabey zho.

²³ Golguien ganle, grëse to laa Dios bzhiile to ni nroob gocnon to, gacxe waa mele rnabey to; ni togaa, lo me none gun to dziin, gdeete to diidz lega gnabey miech to.

²⁴ Sca nasca gon bets gaca, tib tib to zigne nace to zeene bzëëb to xnëz Dios scase no gban to, ine gleynie to me.

²⁵ Stib wnabdiidz ne run to ga dien zha gac zha ne gard ctsieelnia, gneli naa lo to ganle, guiend tib xley Dios mine gnabeypaa dien zha gac zho. Per golquiaadiag mine gne naa nu ganle zha rzaac naa, nanle to ganle, zha ne znu rquia zdoo Dios rbedz me, mine rquiiin min co rnee zho.

²⁶ Grë ne ne nac ne zha ne riladz Xtiidz Dios len dze rii, nligaa ngan nac lo xquielmban ne, gane zoot naa wena zha ne sca gard ctsieelnia, maase guiaantib zho.

²⁷ Zha bgui ne na ptsieelnialejaa, grieelod gni naa guiaantib zho; sca mbannie zho tsiel zho; per tel zha ne gard ctsieelniaw, mazd sobd guic zho ctsieelnia zho.

²⁸ Zha ne racladzpagaa ctsieelnia, zigtaa mguiw zigtaa wnaaw, led dold ga gun zho telne laa zho ctsieelnia; per gacnan zho ganle, zeene laa zho pcatsieel-le, ib tedsod nroob guielne ne gan zho por grë mine noyac len dze rii.

²⁹ Mine none guien to: zhisle nac dze ne so ne lo guidzliu rii, led nroob nac ngbidz ne grieelo dziuun ne xtsiin Dios; gacxe waa, zha ne nole

tsieel, mazd sac zho zho zig tib zha ne guieṅd tsieel.

³⁰ Zha ne quianie dimiw, zha ne no guieṅbleya, zha ne nogaa guieṅnēw, gdeete zho diidz yca grē ncuaaṅ co lo zho par guṅ zho xtsiṅ me.

³¹ Zha ne bienle runfalte grētaa ncuaaṅe rquiin zho, gdeete zho diidz ctse grē ncuaaṅ co lo zho, sac zigtaa guidzliuw, zigtaa grē ncuaaṅe no low, zdziṅ dze ne nitlow.

³² Miṅe racladz naa peet zhgab ctсед lo to. Goṅwi ganle, zha bgui ne tib, tiblique zienie guic zho run zho miṅe rdziladz Dios, miṅe nac xtsiṅ me.

³³ Laa zha ne no tsieel, grieelodraa sca gac zho, sac laa guic zho zienie zha gbannie zho tsieel zho, zha grieelo guṅ zho miṅe rdziladz me, miṅ co rionieraa guic zho.

³⁴ Scaque grē meṅ wnaa, zha ne tib, rioxcoraa zho run zho miṅe rdziladz Dios, dib nacse zho rbeeladz zho zho lo xtsiṅ me. Laa zha ne ptsieel-niale, xco ne dieṅ zha gbannie zho tsieel zho, dieṅ zha grieelo guṅ zho miṅe rdziladz tsieel zho, xco co rioraa zho.

³⁵ Laa naa rne miṅ rii lo to, per guiabde to togo rca naa ctsieelnia to, sinque laaw rne naa parne guieṅ to zha guṅ to, zeena grieelo zaacse gac to guṅ to miṅe rnabey Dios.

³⁶ Zha ne quianie wnaa nguieg, telne rzac zho nonguieṅda ga scase ted lo xquieṅnguieg xpēed zho, sinque none ctsieelnia zho, peet nacda, led doṅd ga ctsieelnia zho.

³⁷ Laa telne rzacгаа zho, wenraaw ctsieelniad xpēdwnaa zho, ible scale pquiabladz zho guiaan mēed, wenaque ga telne sca rzac zho.

³⁸ Wen ga guṅ zha ne sca gdeed diidz ctsieelnia xpēdwnaa, per mazdraa wen ga guṅ zha ne rzac mazd ctsieelniad xpēēd.

³⁹ Nana, wnaa ne retgaa tsieel, nli zeene mban tsieel zho rnabey ley ne tsieelse zho gbannie zho; per zeene laa tsieel zho ret, zac ctsieelnia zho tel cho stib mgui ne racladz zho, totsaque zha ne noque xnēz Diosa.

⁴⁰ Per tel naa, rzac naa mazdraa wen gban zho telne tsodraa guic zho ctsieelnia zho stib; sca nagon rzaac naa wena, ni led xtiidzde naaw sac rien naa led tibd naa, Espíritu Sant nacie naa.

8

Bëel ne rgogon zho lo mdio

¹ Stib wnableidz ne run to ga, dien zha nac guielwagw ne rgogon zho lo grē mdio, pe zrieelo gdioowa, te grieeloda ye. Zootle na grēle to nan min co; per no hor zeene squi rzac ne grēlew nan ne, lel racniats ne, laa ne gacndooladz ne gnee ne lo grē zha ne nacgrē ne dien zha guṅ zho parne tsoguicraa zho Xtiidz Dios.

² Zha ne rzac grēlew rac zho, ga rlu zho ganle peet rienḍ zho.

³ Tel Dios runbey me tib tib miech, nanpaa me cho nac zha ne rleynie me.

⁴ Zhapaa dzigo gaca, ꞥpe wena dioow ne xpēel grē ma ne rgogon zho lo mdio ga, te wenda ye? Ndionle ne ganle grē mdio ne riegau miech led Diosd ga, tibaque men ne nac Dios no.

⁵ No zho rzac nziandox Dios, nziandox men rnabey no, no me no gbaa, nogaa me no lo guidzliu,

⁶ san_gue ne ndion_n ne gan_le tibaque Dios no, lëe me_n co nac P_xoz ne, me psan_n grëtaa ncuaane no, me psan_n ne parne d_ziuun_bey ne me. Ni scaquegaa, tibaque me_n ne rnabey ne, lëe me ga nac Jesús, me b_zaa grëtaa ncuaane no, me nac me_n ne rneedz x_quiel_mban ne.

⁷ Per no zha ne riladzle Xtiidz Dios, bii gar_daque guien_n zho ne tibaque Dios no. Tibaque rzac zho mban mdio, gane zeene r_quiin zho bëel ne rgogon zho lo mdio racchop guic zho, lëeque zha run_tal x_tol_l zho ga sca run_n zho.

⁸ Gol_guien_n sca, tel_l Dios rwid me dien_n cho pe row. Guiabd ne togo por gow ne o gowdgaa ne bëel co laa ne guian_nziuu lo me.

⁹ Laa to nan_le nasca, peet nacda y_quiin to guiel_wagw co, per scagaa gol_cobey adel_l min_n co y_quiaaqui gun_tal to x_tol_l tib zha ne squi bii racchop guic.

¹⁰ Sac gon_n, nenda tibliladz to zob to zaatne riegan_n grë miech mdio noquiin to bëel co, ni gan_n tib zha ne bii racchop guica. Zeene gan_n zho to, nend yeque zho gbig gow zhow, per zeene lozh ga tibaque laa guic zho tsienie lëda ga been_n zho.

¹¹ Zha ne sca gun_n, niicle ne nli rien_n zho peet nacd ncuaane noyun_n zho ga, per por zha laa zha co gun_tal x_tol_l. Gun_scade to, gol_guien_n gan_le ye zho ga psilaa Jesús zeene gut me lo cruz;

¹² gacxe waa, tel_lne sca gun_n to por to y_quiaaqui gun_n zho tib ncuaane rzac zho nonguiel_d, lole Jesús ga quiayun_n to falt.

¹³ Min_n co nagon_n, tel_l naa mazd maase gowd naa bëel co, tel_lne por min_n co y_quiaaqui gun_tal naa x_tol_l

tib zha ne nole xnëz Dios; sac lëda ga gun naa gac naa zig tib quie ne griel ni zho.

9

Minë rieguial zha ne run xtsiin Dios

¹ Zigne nagon zac gun to grë ncuaane wen ne racladz to, scaquegaa naa, zac gnab naa ncuaane wen ne racladz naa. Tel naa gonlo naa Jesús men ne rnabey ne, Dioszhal bzo naa pxeel me naa none naa Xtiidz me. Ne squi ptsëë Dios lo xquielmban to zeene bialseed naa to, i rlu ganle me nacie naa.

² No zha ne rzac nlid Dios pxeel naa, sangue to nanwen to ganle me pxeel naa, sac gonlo to minë beñ naa, minë blu naa; ni scagaa niina, lo xquielmban to i rlu ganle ne nli xtsiin me quiaayun naa.

³ Grë zha ne sca rzac nlid Dios pxeel naa, rzac zho peet raguiald naa, gacnan zho ganle:

⁴ ¡Raguial naaw gon! Ni grëragaa zha ne rdziuungza no xtsiin Dios, rioguial no gneedz to ncuaane yquiin no, gneedz to zaatne gbiaaz no.

⁵ Tel naa, haxta raguial yquianie naa tib men wnaa ne gac tsieel naa, inë sënie naa me zigne run grëraa zha ne rdziuungza no dziin rii, zig nac Pedr, zig nacgaa grë zha bets men ne rnabey ne.

⁶ ¿Te loxaque grop no Bernabé naye znu zhaaque no dziuun no stib dziin, par gdziniaa no ncuaane dioow no?

⁷ Golgan ganle, zig nac zha ne rzëëb lo xtsiin menguiib, ¿niacxe zhaa lo dziin ne rdziniaa zho ncuaane row zho rio zho lo xtsiin menguiib? ¿Zha ne rangaa, niacxe rieguiald zho yquiin zho ncuaane rac zaatne ran zho? ¿Zha ne na rangaa ma,

niacxe rieguia_ld zho yqu_iin zho ma zigne racladz zho?

⁸ Guiabde to togo bod guicse naa riab mi_ne rne naa nu, gol_ga_n ga_nle haxta lo ley ne psan Moisés

⁹ no tib zaatne rnee: “Zee_ne gu_ncun to xcon to dziin gzeëni ma mzion zhobxtil gacmbew, code to guiex ro ma, gol_saan gow ma mi_ne yгаа ro ma.” Gol_wi ga_nle zha rnee Dios, nana pe na_n to ngonse rquia zdoo me.

¹⁰ Lëda gon, grëse ne rquia zdoo me ne. Ga rlu me ga_nle, zha ne ru_n xtsi_n me, ible rieguia_l zho ycaa zho mi_ne non xtsi_n zho. Zig nacaque guiel_gon, zigtaa zha ne rana, zigtagaa zha ne ru_nmbe grë guiel_nzaac co, ible rieguia_l zho yqu_iin zhow.

¹¹ Tel_l no, rriequia nazho tib gon i bdiuun no biadseed no to Xtiidz Dios, ¿niacxe rioguia_ld no dzigo gneedz to ncuaane yqu_iin no?

¹² Blalaa zha ne nale gri_n riaadted lo to i, rnabey zho to rdeed to ncuaane rqu_iin zho, ¿pe le_l no dzigo rioguia_ld gnaba lo to? Mazdraa gon rioguia_l no gnab now, per haxta lo nadze gard dziuun no mi_n co, notaa na_n zha rdziniaa no ncuaane rdioow no; zee_na guiaand zdoo to, lozh ga laa to csaan mi_ne nac Xtiidz Dios.

¹³ Led na_nle to ga_nle, grë zha ne ru_n dziin le_n xyadoo Dios, psan me diidz grë ncuaane nac gon, ga xen_l zho pe yqu_iin zho, zig nac zha ne ru_n dziin zaatne nac lo pcoog, lo ncuaane rielogon miech ga, ga rdioob ncuaane row zho.

¹⁴ Ni scaqueгаа psan Jesús diidz, zha ne cseed miech Xtiidz me, ib none lo dziin co gdziniaa zho pe yqu_iin zho.

15 Per tel₁ naa gon₁, w₁laltaa peet gard gnab naa lo miech.

Laa naa rzet min₁ rii lo to, per guiabde to togo run₁ naaw parne csilo to pe gneedz to lo naa. Ib zana₁d naa min₁ co, sac rley naa znu quiayazhd naa quiayun₁ naa xtsiin₁ Jesús, mazd maase guetgbin naa, lëdle ctiche zho guiel₁bley rii lo naa.

16 Niicle ne znu quiayazhd naa quiayun₁ naa dziin rii, per ni lalnu racniatsd naa, sacne ible laa Dios bzo naa par gne naa Xtiidz me lo miech; ni, jprobsaxe naa tel₁ne gned naaw!

17 Noyun₁d naaw par dien₁ pe premio ygaa naa, sac zig rne naa ga Dios bzo naa, me rnabey naa quiayun₁ naaw, masaque nacse naa zig tib ngun₁dziin.

18 Par naa, lëële premio nu nac guiel₁bley rii ne znu liga quiaseed naa miech Xtiidz Dios, rnabd naa gneedzpaazho ncuaa₁ne yquiin naa niicle ne ragua₁l naa gnab naaw.

Tsoxco zho ygaa zho premio

19 Stiba mazdragaa wena, znu choot noneedzd ncuaa₁ne yquiin naa, sac sca grieelod cho gnabey naa; per niicle ne nagon₁ choot rnabeyd naa, zhaal naa rac naa zig tib ngun₁dziin lo grëse miech, parne gdeeda diidz tso guic zho sëëb zho xnëz Jesús.

20 Gacxe waa zeene no naa lo grë zha Israel, rac naa zigne rac zho, zeena₁ tso guic zho gliladz zho cho nac Jesús. Zeene nogaa naa lo grë zha ne ziana₁l xley zha Israel, niicle ne rnalodraa naa ley, per run₁ naa grë ley ne ziana₁l zho, zeena₁ sca grieelo yquiabladz zho sëëb zho xnëz Jesús.

21 Scaquegaa zeene no naa lo grē zha ne runbeyd ley co, rioxco naa rac naa zig tib zha ne runbeyda; per guiabd ne togo haxta grē ncuaane rleyniedraa Dios run naa. Laa naa run min co, zeena ye zho sēeb xnēz Jesús.

22 Grē zha ne pense quiayacnan zha nac Xtiidz Dios, zeene no naa lo zho, rund naa gne naa grē ncuaane gard guien zho zha nac, rund naa csanwin naa zho, sac mine rioxco naa lozh gliladz zho cho nac Dios. Tib tib miech, rguib naa rac naa zigne rac zho, parne grieelo gzodiidz naa lo zho cho nac Jesús, zeena gacnan zho zha sēeb zho xnēz Dios.

23 Laa naa run min co, parne gdeeda diidz gnee naa Xtiidz Dios grēse lo miech, ni scagaa, gley naa gan naa ye zho yгаа lo guielndzon ne zhobnee lo Xtiidz Dios.

24 Nanle to ganle zha rzac zha ne rie tib lo corr, nzian zho nac zha ne rie per tibaque zha ne run gan, zha co rcaa tib premio. Golgun cuent nasca tib lo corr i no to, grēse to goltsoxco xoon to zeena grēse to yгаа tib premio.

25 Grē zha ne sca rio tib lo wguit, par grieelo gun zho gan rioxco zho ran zho xcuerp zho, rund zho ncuaane csiaab xfuers zho. Nroob cuidad ne rap zho zho par gun zho gan tib coron guizh nguia ne znuse rgool. Scase nac premio ne rgaa zho, sangue ne gon, laa ne noxco yгаа ne tib premio ne gdziind dze nitlo.

26 Gacxe waa, tel naa tibaque noxco naa dien zha xoonraa naa. Nanpaa naa pa gdziin naa, nacd naa zig zha ne rien dien pa gdziin, zha ne lega rquiaagaa puñet, rdeete zhow zaatne no ygaaw.

27 Ni lalnu rdete naa diidz gac mine racladztaa

xcuerp naa, tibaque rnabey naaw parne guieṇa ncuaaṇe nonguiel̄ min̄ co none guṇa, led guṇda ncuaaṇe racladztaaw. Laa naa run̄ min̄ co zeeṇa guṇ naa gan, sac goṇ, guiel̄todox ga grieequia naa znu no naa none naa lo miech zha guṇ zho, ni tel̄ lozh ga naapaze biaan̄ beṇd naa gan.

10

Nodne gleyṇie miech mdio

¹ Bets, bzian, goṇsoladz ganle zha bzhaac grē pxozgol ne zha ne sca bzēnie Moisés ga. Pxeel̄ Dios tib xcow been̄ ncal zaatne zieetaa zho, ni pteed me zho lo Nisdoo Nizhnie.

² Zigtaa lo xcow cow, zigtaa lo nisdoo cow, masaque rrieequia lo co brobnis zho, parne tibaque niac zho niacnie zho Moisés.

³ Grēse zho goṇ milagr nroob ne been̄ Dios, bnabey me bliaal̄ guietxtil zhan gbaa bdeed me dow zho,

⁴ been̄cta me nis tib cho quie bdeed me go zho no zho dan bidz co. Lēēle Jesús ga bdeed nis co go zho. Lo zho ga zo me, rrieequia me ga nac quie ne bda nis go zho, sac mese rzhixcuaa lo grētaa xliaadz miech.

⁵ Niicle scataa goṇ Dios zho, per led grēd zho bioxco nion xtiidz me, nacne ndal zho bnitlo bioliuse zho dan co.

⁶ Gase na ganle gotsaa gwi ne zha bzhaac zho, zeeṇa gzoobladd ne dziuun̄ ne grē ncuaaṇe ndzinlid ne been̄ zho.

⁷ Golguieṇ gleyṇiede to mdio, zigne been̄ zho. Rnee lo Xtiidz Dios: “Blozhse dow zho, go zho, laa zho psilo biee lo zhimdio zho.”

⁸ Gotsaa gwi ne ganle, pe guielnë ne bgaa zho zeene briequia bla zho lega bionie wnaa, tib dzeque bnabey Dios gut galptson mil zho. ;Ni lalnu tsod guic to gun to min co!

⁹ Ib gunglëede to Dios, sac zha, zeene benngulëe zho me, bnabey me briequia grë meel pquiaa maw zho, ndal zho gut.

¹⁰ Niicle glisquidgaa to tel pe nac mine quiayun me, sac tel zha, sca been palal zho; nacne pxeeaque me anjl ne rnitlo, ndal zho bnitlo anjl co.

¹¹ Sca nagon bzhaac grë pxoz gol ne ga, gotsaa guien ne sca dziuund ne mine been zho, mine been zho ga laaw zhobnee lo Xtiidz Dios parne gacndion new, guien ne zaacse gban ne, ne nac ne miech ne mban len dze rii ne znu ziaadyoble nitlo guidzliu.

¹² Gacxe waa, zha ne rzac mbanpaa zho zigne racladz Dios, none nsin so zho zeena gund zho ncuaane gunctal xtol zho.

¹³ Nli no ncuaane rcheep ne gunctal ne xtol ne, per nacda ncuaane griin rien. Pe zhidaa miech ne zieded lo min co. Tsod mine guiab ne ib lëbd ne griee ne lo. Mine naca none gnalo ne Dios, sac tel me ib csaand me guiab ne tib lo ncuaane glëbd ne griee ne; sca nac xtiidz me, ni mesi gon ctsëed me mine rnee me. Me nac men ne gacnien ne grieelo griee ne low.

¹⁴ Bets, bzian, golguien sca ib none csaan to grë mdio, gnalodraa tow.

¹⁵ Miech nixbiini nac to, grë mine rne naa lo to nu, nan to ganle ncuaane rquiina.

¹⁶ Golwi ganle, zeene rdioow ne quietxtil, rdio ne vin, rdziuun ne xtsee ne been Jesús ga, ga rlu tipse

nac ne grë ne nacie ne me.

¹⁷ Niicle ne ndal nac ne, per ne tibaque guietxtil ne rdioow ne, miñ co gane tibaque cuerp nac ne grë ne, ni lëë xcuerp Jesús ga.

¹⁸ Scaque zha Israel, zeene row zho xpëel ma ne riogon lo Dios, ga rlu zho ne nacie zho me.

¹⁹ Zha ne rnalogaa mdio, zeene row zho grë ncuane riogon lo mdio, scaque tibaque rac zho grë zho mdio. Per guiabde to togo mban mdio, togo mazdragaa nac bëel ne rgogon zho lo mdio.

²⁰ Mine racladz naa guien to, zeene sca run grë miech pe rgogon zho lo grë mdio, lo menox ga rgogon zhow, led lo Diosda. Golguien sca, ib tsiesëebde to lo grë zha ne quiayownie mdio, zeena gacniede to menox.

²¹ Lëdraaw ga gon gun to, tel rlozhse rquiin to xtsee ne psan Jesús diidz ga dziuun ne, ni tsieque to tsieguie to, tsietow to zaatne rownie zho menox.

²² ¡Gunscaade to, gunglëede to Dios! ¡Golguien ganle, lëbd ne dzian ne xquieblëe me!

Zha gun zha ne rliladzle Jesús

²³ Zig rne naa ga: “Nli zac gun ne ncuane gacladztaa ne, per led grëda nonguiel.” Tel naa, zrieelo gun naa ncuane gacladztaa naa, per led grëda yquiin par gun naa xyudar grëraa zha bets ne, lozh tsoguic zho Xtiidz Dios;

²⁴ sac gon, ib none dzioxco ne grëraa zha ne nacgrë ne.

²⁵ Zig nac grë bëel ne rdo lo lgui, zac gow tow, ib gunde to gnabdiidz to dien zha naca, sac gon nend

bëel ne biogon lo mdiow, dzigo laa dzeb co tsonie guic to.

²⁶ Golguien ganle, Dios psan guidzliu, scagaa grëtaa ncuaane no low chen me naca.

²⁷ Zeene tel zha tsiegaa to tib wagw lidz tib zha ne gard gliladz Jesús, bëel ne gneedztaa zho golgowa, per scaque gnabdiidzde to dien zha naca; zeena peet dzeb tsonied zdoo to.

²⁸ Per telne grieequia tib zha ne gnë bëel ne biogon lo mdiow, gowde tow; zeena csande to zdoo zho.

²⁹ Niicle ne ndionpaa ne led dold ga gun to gow tow, per zha ne gana ga sadol zdoo zho.

Nana gnë to: “¿Pe nac dzigo por stib zho grieelod gun naa mine racladz naa?”

³⁰ Tel rded naa xquizh lo Dios zeene pe tib guielwagw ne rquiin naa, ¿pe nac dzigo por mine rzacse stib zho, grieelod gow naaw?”

³¹ Golguien ganle, racda por zha cose; sac grëse ncuaane dziuun ne, haxta ncuaane dioow new, ncuaane dio new, none zeene nodziuun new cxobnen ne ganle pa lotaa men nroob nac Dios.

³² Gotsaa guien ne sca ganle dziuund ne ncuaane yquiaaqui csan ne zdoo stib miech, zigtaa zha Israela, zha stib guiedza, zha ne nolegaa xnëz Diosa.

³³ Tel naa, zanaid naa ncuaane gdziladz naa naase, sinque rioxco naa grëtaa ncuaane run naa, run naaw par gacnie naa grëse miech, zeena grielo tso guic zho gnab zho lo Dios csilaa me zho lo xtol zho.

11

¹ Golwi sca, zigne ran to noxco naa mban naa zigne blu Jesús, scaquegaa to goltsoxco gban to zigne ran to mban naa.

² Bets, bzian, rleynie naa to gon sac tibaque rsoladz to naa, ni rioxco to zienal to grè mine pseed naa to.

³ Per golsoladz ganle: grèse men wnaa, none zha bgui gnabey lo zho, tel zha bgui Jesús rnabey lo zho, zigne rnabey Dios lo me.

⁴ Gacxe waa, tel tib zha bgui yase nozodiidnie zho Dios, quiateedgaa zho xtiidz me, ni zob xombrel zho; xquielto Jesús ga rbee zho.

⁵ Scagaa men wnaa, tel zhoobd bay guic zho ni zo zho nozodiidnie zho Dios, quiateedgaa zho xtiidz me, xquielto mgui ga rbee zho; sac ga rlu zho rond zho mine rnabey mgui.

⁶ Telne racladzdga zho gdze lad guic zho, mazd gnabey zho chug guitsguic zho. Laa telne rtoladz zho chuga, rtoladz zho gacruxa, dzigo mazd cxobguic zho xpay zho.

⁷ Grè zha bgui, nod pe nacne gdze lad guic zho, sac choot samiech guidzliu zho rnabeyd lo zho. Zeene bzaa Dios mgui, bzaa me zho zigne nac me, zeena glu zho ganle pa lotaa men non nac me; scagaa wnaa, laa wnaa biaan par glu zho ganle non mgui.

⁸ Gotsaa gwi ne ganle, letxe xcuxtid wnaa waa biao mgui, sinque xcuxti mgui brie biao wnaa.

⁹ Stiba, zeene psan Dios wnaa, ib laa me psan zho par gacnie zho mgui.

¹⁰ Gacxe nagon waa ib none gdze lad guic wnaa, zeena glu ganle nguzobdiidz zho lo zha ne rnabey

zho; haxta grë anjl ne no gbaa zley zho gan zho miñ co.

¹¹ Per guiabde to togo peet nond wnaa, gol_lsoladz gan_le psan_le Dios diidz zigtaa mguiw, zigtaa wnaaw rquiinsa zho; sac tel_le guiend wnaa guiend mgui, tel_le guiendgaa mgui guiend wnaa.

¹² Gotsaa gwi ne gan_le, zeene biala wnaa cho mgui brieedzit ne biala wnaa, per zeene laa wnaa biala, haxta lo nadze wnaale rzo mgui; zigtaa mguiw, zigtaa wnaaw Dios psan zho grop zho.

¹³ ¿To nadien zha rzac to? ¿Pe nli nonguiela gdze lad guic wnaa zeene nonab zho lo Dios, te nonguiel_lda ye?

¹⁴ Gol_lwi gan_le ib no gdze guic wnaa, bialan_le zho rroob guits guic zho parne ctsew lad guic zho;

¹⁵ tel_l zha, haxta rleynie zhow zeene scataa noola, sangue ne nac ne zha bgui, guiel_ltow ga guiool guitsguic ne.

¹⁶ Tel_l nogaa zha ne rzac led scada, maase gnee zho. Per ible znu gon noseed no miech, ni grëragaa zha ne riladze Xtiidz Dios, rien zho ne nli scaw.

Zha none gac xtsee ne psan Jesús

¹⁷ Bets, bzian, ne nligaa rley naa tibaque rsoladz to naa, per bin naa zeene rcaalsa to row to xtsee ne psan Jesús diidz, laa ne gley to ycaalsa to, lel_l quiayuntal to xtol_l to. Miñcosi nagon ni lalnu riold zdoonaaw.

¹⁸ Ziyon naa gzobtaa zeene rcaalsa to, pe na tsiegald tildiidz to, laa ne tipse gac to lel_l rlëlsa to. Ni rgobey naa nli scaw.

19 Rien naa masaque rzac to ible sca none gac to, parne glupaa cho nac zha ne non xtiidz, zeena guianzuiuu zho lo miech.

20 Led zhixtseedraa Jesús i gon run to.

21 Sac ron naa zeene laa to row, masaque lëëled rac to row to ncuane zienie to, ib rwide to no zha ne rdziñ ga quianied zho nroob ncuane gow zho. Squi rzob to rowcho to, haxta rzudz to; laa zha mbanse rac zho grieelod gow zho ncuane row to.

22 ¿Mod guiend lidz to, ga sob to gow to, guie to haxta zaatne gueltaa to, led node to runctoladz to zha ne squi guiend pe yquiin? I gon rlu to rleyniede to grë zha ne no xnëz Dios. ¡Ni palal gon rdziguiend naa ncuane noyun to i!

23 Gol soladz ganle zha nac ne laa xtsee rii biaan, Jesús psan diidz gaca, sca gocnan naaw ni sca-gaa biallu naaw lo to. Wdze ne bnaaz zho Jesús ga, zeene blozh dowxtseenie me xpëedscuel me, bzhen me tib quietxtil, bdeed me xquizh lo Dios;

24 blozhse bdeed me xquizh, nzian lë been me quietxtil co, bdeed mew lo zho rëb me: “Golquiina, rrieequia lëë xcuerp naa nu, sac gon znu gun zho xcuerp naa parne csilaa naa to grë to. Golgun xtsee rii, parne glu to ganle tibaque rsoladz to naa.”

25 Blozh ga, scaque bzhen me tib cop no vin, rëb me lo zho: “Lëë stib trat cub nu gon riaan Dios grë me miech, rrieequia xchen naa nu nac vin rii, ren ne tso sell trat co par glu nona. Gzataa zeene znu guie to vin, gol soladz ganle zha naca.”

26 Golguien sca, zeene guntaa to xtsee co zaacse golguna, sac gon, ga quiaxobnen to lo miech Jesús nac men ne gut xcuent to, psilaa me to. Tibaque

none guṅ to xtsee co, haxta gdziṅ dze ne laa me guiaad stib.

²⁷ Gacxe waa, zha ne rieniewguit guic rquiind zho xtsee co zigne no yquiin zhow, doḷ nroob ga ruṅ zho, xcuerp Jesús ga, xchen me ga noguitnie zho.

²⁸ Zeene guṅ to xtsee co, none wen wen sob to gaṅle zha naca, pe nacne laaw rac, dzigo lozh ga zac yquiin tow.

²⁹ Sac goṅ zha ne lega gow guietxtil co, lega guie zho vin co, sac zhow zig beelze pe xtsee; rriequia guielṅe ne yгаа zho ga gow zho, guielṅe co ga guie zho.

³⁰ Mincoxe waa, blactaa zha ne nacgrē to i quiayaan nsis, nogaa zho rzacṅe, haxta nzian zho gutle.

³¹ Telne niaca miṅe wen wen gwi ne gaṅle zha nac xtsee co, tsod pe nacne pe guielṅe ne cxeel Dios dziaṅ ne.

³² Ni zeene scagaa rteed me ne tib caxtigw, laaw ruṅ me parne taa ne biini gbiire gbig ne lo me, zeena led yed ne nitlo gaḷ dze ne nitlo grēraa miech ne zianaḷ ncuaaṅe lo guidzliu rii.

³³ Bets, bzian, goḷguieṅ sca zeene ycaalsa to guṅ to xtsee co, goḷcuēz grēraa zha ne nacgrē to dzigo tipse goḷsilo goḷquiina.

³⁴ Tel zha ne riengaa lēbd zho lozh gdziṅ grēraa zha ne nacgrē zho, mazd gowgazh zho lidz zho, zeena yguibd zho yгаа zho guielṅe co.

No spalal miṅe racladz naa gacnaṅ to, per naa zeene guiaḷ naa nēz qui dzigo gne naaw lo to.

Guielbiini ne rdeed Espíritu Sant

¹ Bets, bzian, nugaa na ganle laa naa gzet zha nac guielbiini ne rneedz Espíritu Sant, sac racladz naa wen wen guien to zha naca.

² Rsoladz to ganle zeene gard gliladz to Xtiidz Dios, nēzrii nēzrec bio to güeygan to stib stib grē mdio, ncuaañe ni tib lan diidz rneed; sangue Dios ne rliladz to niina, led scad nac me.

³ Per nsin golso dien cho nac zha ne noteedpaa xtiidz me, sac nzian zha ne rnee xtiidz Espíritu Sant noteed zho lo miech, per tel rzo zho rdzibdee zho Jesús, ga rlu rquidie zho. Sac zha ne nli nacie Espíritu Sant, rdzibdeed zho Jesús, sinque rlu zho ne me rnabey zho, ni haxta dib zdoo zho rnee zhow.

⁴ Tib tib zha ne rliladz Jesús, zhaase zhaase nac guielbiini ne rgaa zho, per tibaque men ne rdeeda, lēē men co nac Espíritu Sant.

⁵ Nzian mod zrieelo dziuun ne dziin lo Jesús, per grēse ne me rnabey ne.

⁶ Tib tib ne zhaase zhaase mod ne rlu Dios nacie me ne, per grēse ne me nac men ne rlu zha dziuun ne xtsiin me.

⁷ Guielbiini ne rneedz Espíritu Sant lo ne tib tib ne, laaw rneedz me parne dziuunlsa ne xyudar grē zha ne nacgrē ne gacndionraa ne zha racladz Dios.

⁸ No lo zho rdeed me guielbiini rien zho zha cso zho diidz lo miech,

no lo zho rdeed me guielbiini rseed zho grē ncuaañe ngañ ni rlu zhow lo miech.

⁹ No lo zho rdeed me guielbiini dib zdoo zho rnalo zho Dios, niicle ncuaañe mazdraa ngañ rnab zho lo me, raca.

No lo zho rdeed me guielbiini zeene rnab zho lo Dios, riac grë men rzacnë.

¹⁰ No lo zho rdeed me guielbiini rnab zho lo Dios rac grë milagr,

no lo zho rdeed me guielbiini rteed zho xtiidz Dios lo miech,

no lo zho rdeed me guielbiini rien zho cho nac zha ne nlipaa nacie me, cho zhagaa nacie mendox.

No lo zho rdeed me guielbiini rnee zho stib diidz ne gard cseed zho,

no lo zho rdeed me guielbiini rien zho pe rnee zha ne rnee diidz co, dzigo rnee zhow.

¹¹ Grëse guielbiini, Espíritu Sant rdeeda, ni me nan pa mine rneedz me lo ne tib tib ne.

¹² Lo grëse ne ne nac ne zha ne no xnëz Jesús, rriequia xcuerp me nac ne. Tel cuerp, niicle ne nzian part niaaw, per tibaque naca.

¹³ Ndal miech ne nac xcuerp me, no zho nac zha Israel, no zho nac zha zit, lo grë zho no zho ngadoo lo ben, nogaa zho zonlaa, per grëse ne tibaque Espíritu ne nacie ne, sac tibaque Espíritu bgaa ne zeene brobnis ne.

¹⁴ Gotsaa gwi ne ganle, no ni ne, no nia ne, no diag ne, nzian lë niaa xcuerp ne, per tibaque naca.

¹⁵ Gacxe waa telne niaca mine rnee ni ne, grieelod guiaba porne nacda nia ne, nacda xcuerp ne.

¹⁶ Scaque diag ne, grieelod guiaba porne nacda bziaalo ne led yedraaw nac xcuerp ne.

¹⁷ Sac telne niaca mine gdipse xcuerp ne niaa bziaalo ne, ¿zha nadien gon ne? Telne gdipsegaa xcuerp ne niaa diag ne, ¿zha gzoobzhi ne?

18 Lëezhe wen led scad psan̄ Dios xcuerp ne, sinque grëse part ne niaaw bzaa mew zigne go-cladz me, psan̄se mew zaatne rquiina tib tiba.

19 Sac tel̄ne tipse niaa grëse part ne nac xcuerp ne, ;zhazhe rlu ncuaan̄ co!

20 Gocda sca, sinque zhaase zhaase nac tib tib part co, per grësew tibaque cuerp naca.

21 Gacxe waa grielod guiab bziaalo ne lo nia ne: “Ib rquiind naa luu”; guiaabgaa guic ne lo ni ne: “Ni lalnu rquiind naa to.”

22 Grëse part ne niaa xcuerp ne nose zaatne rquiina, haxta miñe mazdraa nda lëe miñ co rquiinraa.

23 Stiba, no part ne niaa xcuerp ne rzac ne zhi nona, no part haxta rtoladznie ne, per gotsaa gwi ne gan̄le part co nac zaatne ran̄raa ne, rioxcoraa ne rdze;

24 sangue part ne nziuu lo ne, zienied guic ne dien̄ zha gdzew. Ible sca psan̄ Dios xcuerp ne, zeena sca gacnon part ne rzac ne zhi non.

25 Sca niaa xcuerp ne, grëse part ne niaaw rquiinlsaw xcompañera; led yeda rtsolsa.

26 Gol̄wi gan̄le, zeene nē tib part xcuerp ne, grëse part ne niaaraaw zienie nē co; scaquegaa zeene rdioon̄ tib part co grësew zienie guiel̄bley co.

27 Laa naa rne miñ rii lo to, sac racladz naa guien̄ to sca none tipse gac to. Gol̄guien̄ gan̄le xcuerp Jesús i nac to grē to, tib tib part ne niaa cuerp co i nac to, rquiinlsa to zha ne nacgrē to.

28 Ni zigne sca tib tib part ne niaa cuerp nose zaatne rquiina, scaquegaa grëse zha ne no xnēz me, bzose Dios zho pe nac dziin ne gun̄ zho: no zho rienee xtiidz me lo miech,

no zho rteed xtiidz me lo miech,
 no zho rseed miech xtiidz me,
 no zho rnab lo me rac grë milagr nroob,
 no zho rnab lo me riac meñ rzacnë,
 no zho rioxco ruñ xyudar grë miech,
 no zho rzo rac zho zha rnabey,
 nogaa zho rnee grë diidz ne gard cseed zho.

²⁹ Golgan ganle, psod me zho grëse zho tsienee xtiidz me lo miech, grëse zho cteed xtiidz me, grëse zho cseed miech xtiidz me, grësegaa zho gnab gac milagr.

³⁰ Niicle psodgaa me zho grëse zho gnab guiac men rzacnë, grëse zho gnee stib diidz, grësegaa zho gnee zha nac grë diidz co.

³¹ Zhaase zhaase nac guielbiini ne rgaa tib tib zha ne no xnëz me, per goltsoxco yгаа to guielbiini ne mazdraa rquiin.

Sca nagon naca, per golquiaadiaga ganle, nu laa naa gzet lo to stib mine mazdraa non lo grë guielbiini rii.

13

Guiełwleynie

¹ Mine mazdraa rquiin gon nac ne gleynie ne samiech ne. Tel niaca mine bgaa naa guielbiini rne naa grë lose diidz ne rnee miech, haxta grë diidz ne rnee xanj Dios rne naa, ni tel rleynied naa samiech naa, ¿pa dien rquiin rac naa grëtaa diidz co? Rrieequia nac naa ga zig tib lë guiib ne loxaque rzedz.

² Tel niaca mine rteed naa xtiidz Dios lo miech, rien naa pe nac mine naraa cxobnen me, grëse wseed ne no rien naa, ni rleynied naa samiech

naa, i_paat r_quiinda! Te_l dib zdoogaa naa r_nalo naa Dios, haxta n_cuaane mazdraa n_ga_n r_nab naa r_un mew, ni r_leynied naa samiech naa, i_peeet nonda!

³ Te_l q_uiizgaa naa gr_e n_cuaane quianie naa lo gr_e zha ne g_uiend pe y_quiin, haxta g_ded naa naa tsec naa, per te_l r_leynied naa samiech naa, i_zhl_ese ga g_un naa m_in co!

⁴ Sac g_on zha ne n_li m_ban zigne nac g_uiel_wleynie co:

rieednied zho samiech zho,

wen rac zho lo samiech zho,

racn_ed zdo_o zho, niicle ra_n zho wenraa noded stib miech lo zho,

r_und zho ne l_ee_que zha g_unnon zho,

racniatsd zho lo samiech zho,

⁵ r_und zho n_cuaane cog_uiel_ne zho, g_ungl_ee_gaa zho samiech zho,

ziena_ld zho ne tebaa lose zho y_quiin gr_e pe cos,

nacd zho zha ne lega zol_ee,

rap_guiel_ned zho samiech zho,

⁶ ni lalnu riod zdo_o zho m_ine r_un zha ne rsacsi samiech,

m_ine rleynie zho nac diidzli.

⁷ Zha ne n_li rleynie samiech, ni lalnu peet grieelod yca gleynie zho zho; r_quiaadiag zho m_ine rnee zha co, rzhidznied zho zho; tiba_que r_quiabladz zho wen grieequia zho, rsaand zho zho, tiba_que racnie zho zho.

⁸ Zdzi_n dze y_quiindraa cho cteed xtiidz Dios lo miech, y_quiindraa gnee zho stib diidz, y_quiindraa gr_e g_uiel_rac, sa_ngue g_uiel_wleynie gdzi_nd dze ne nitlow.

⁹ Niicle ne nogaa ne guielbiini ne rneedz Espíritu Sant, niicle no zha ne rien zha gnee zho Xtíidz Dios lo miech, per palalse nac ncuaane rien ne niina.

¹⁰ Saṅgue gaḷ dze ne laa Dios lozh gzhixcuaa ne zigne no gac ne, grēse guielbiini ne rdziaap ne niina, paat yquiindraaw.

¹¹ Masaque nac ne niina zig tib mēēdlas. Tel naa, zeene goc naa mēēdlas grēse ncuaane bne naa, grēse ncuaane bien naa, grēse ncuaane pseed naa, grēse ncuaan co ben naaw zigne ruṅ grēraa mēēdlas. Per zeene laa naa broob, laa naa bīaa biini, grēse ncuaan co laa naa bienṅpaa zha naca; laa guielmēēdlas co bded.

¹² Scadaa nagon rziac ne niina, palalse rien ne zha nac Dios, rrieequia rdziaṅse ne me niina zigne ran ne zhimlē ne lo beelze pe tib lē vidr; per zdziṅ dze laa ne dziaṅlo me zigne nacṅpaa me. Palalse ndion ne niina zha nac me, palalse rsilo rdziaṅ ne me, per gaḷ dze co laa ne dziuunbeyṅpaa me zigne ruṅbey me ne niina, naṅpaa me zha nac zdoo ne tib tib ne.

¹³ Golgacnaṅ sca gaṅle, grē guielbiini co zdziṅ dze ne yquiindraaw, saṅgue ne znu: dib zdoo ne rnalo ne Dios, nonieṅpaa guic ne zac miṅe rnee me, ni rleynie ne samiech ne, lozhda. Per lo gza tsoṅa nagon, guielwleynie co nac miṅe gdziṅd dze ne gdzēē.

14

Zha ne rnee stib diidz

¹ Laa to naṅle pa miṅ nac miṅe mazdraa non, iḡolleynie samiech to sca! Per scagaa golṅab yḡaa to guielbiini ne rneedz Espíritu Sant. Zig nac guielbiini

ne rgaa zha ne rteed xtiidz Dios lo miech, goḽnab yгаа to miḽ co zeeḽa sca grieelo cseed to miech xtiidz me.

² Sac teḽ zha ne rgaa guieḽbiini rnee zho stib diidz, zeeḽe rnee zho diidz co choot rienḽ dien pew, sac lo Dios ga rnee zho. Teḽ pe nac miḽe rnee zho ga, Espíritu Sant rsiaaba guic zho, per choot racnand dien zha naca.

³ Sangue zha ne rgaa guieḽbiini rteed zho xtiidz Dios lo miech, miḽe rnee zho ga rquiina par tsoguicraa miech zha racladz me, par guieḽ zho pe nongueḽ guḽ zho, ni rchoobladza zdoo zho.

⁴ Tib zha ne sca rnee stib diidz, lose zho rquiin guieḽbiini co, sac zhase rioguicraa zha racladz Dios; sangue zha ne rteed xtiidz me, diidz ne rnee zho rquiina lo grēraa zha ne no xnēz me, grēse zho rioguicraa zha racladz me.

⁵ Wena tebaa grēse to yгаа guieḽbiini co gnee to stib diidz, per mazdraa goḽ wena cteed to xtiidz Dios lo miech, cseed to miech xtiidz me; sac miḽ co mazdraa rquiin, lēdle gnee to stib diidz. Zacaquegaa gnee to stib diidz co, totsaque lozhse gnee tow, gneegazhaque to dien zha naca; zeeḽa sca yquiina lo grēraa zha ne no xnēz Dios.

⁶ Bets, bzian, to gase nadien, teḽ niaca miḽe glanso naa lo to i csilo naa gne naa stib diidz, ¿pa dien yquiina lo to? Per teḽ glanso naa, ine csilo naa clar gne naa lo to pe nac miḽe zinee Dios lo naa, pe nac grē miḽe rienḽ naa, pe nac miḽe ziaadyob gac, zha nac grē miḽe zhobnee lo Xtiidz Dios, led grēse miḽ co zienḽ to zha naca, ni squiina lo to grēse to.

⁷ Haxta grē ncuaane rooḽ miech, zig nac bzie zig nacgaa vihuel, teḽ csilo zha ne noyoolḽa teḽ zhataa

gool zhow, ¿zha dien guien miech pa di noyool zho?

⁸ Zig nacgaa zha ne rcuedz cornet lo menguiib, telne tel zhataa ycuedz zhow, ¿zha dien gacnan menguiib pe nac vis ne quiayun zho?

⁹ Scadaa nagon run to zeene rnee to stib diidz lo miech, ¿zha nadien guien zho pe nonee to? Rriequia lo mese ga rnee to.

¹⁰ Zig nac lo guidzliu ndal lo diidz rnee miech, per tib tiba nose mod ne rnee zhow, nose zha ne riena.

¹¹ Telne guiaad tib zho lo naa csilo zho gnee zho, ni rien naa pe quianee zho, grielod guien naa pe racladz zho, guien gaa zho zha rzaac naa.

¹² Nana sca, zha ne rquiabladz yгаа guielbiini ne rneedz Espíritu Sant, gnab zho yгаа zho mine grielo yquiin lo grëraa zha ne nacgrë zho, zeena grë zho tsoguic zha racladz Dios gban zho.

¹³ Gacxe nagon waa, zha ne rneele stib diidz, none gnab zho gdeed Espíritu Sant guielbiini lo zho guien zho pe nac grë diidz co, parne gnee zhow lo miech;

¹⁴ sac zha ne sca rnee stib diidz, tel so zho gnab zho lo Dios, rien zho pe nonab zho, loxaque zhiespírituse zho quianee ga.

¹⁵ Gacxe waa zeene gnab ne lo Dios, zeene goolniegaa ne me, zac gnee ne stib diidz, per scagaa none gnee ne diidz ne rien ne, mine rien gaa grëraa miech.

¹⁶ Sac gon tel stib diidz nonee ne noyoolnie ne Dios, nodeed ne xquizh lo me, ¿zha dien yquiab grëraa zha ne ndxie ni rien zho pe rnee ne?

17 Niicle ne ndzon sca nodeed ne xquizh lo Dios, per zha ne noquiaadiaga ga, paat yquiinda lo zho.

18 Xquizh Dios, tel naa ye naa rne stib diidz, ni mazdraa gon rne naaw que zha ne rneew lo to i,

19 per zeene zo naa zaatne ndxie grë zha ne noquiaadiag Xtiidz Dios rund naa ne gnee naa stib diidz, sinque rne naa mine guien zho. Rien naa wenraaw gne naa maase gaayaque lan diidz, per mine guien zho, ledle so naa gne naa tsii mil diidz, ncuane ni tib choot guien.

20 Bets, bzian, golguien sca golsaan guielmëedlas qui. Zacgaa gac to mëedlas per nëz lo guielntseeba, sangue xpensar to golgac zig zha ne biao biinile.

21 Gotsaa gwi ne ganle zha nac stib diidz. Zhobnee lo Xtiidz Dios rëb me, laa me cxeel miech stib dan miech ne rnee stib diidz, par gnee zho lo zha Israel; per niicle tsienee zha co, ib guien zhow.

22 Gase naganle rlu rquiind stib diidz co par grë zha ne rnalole Dios, sinque laaw rquiin parne grë zha ne nod xnëz me gan zho ganle nli no me. Zha ne nole xnëz me, zha co rquiin gon zho pe nac mine racladz me gacnan zho, pe nac mine zhobnee lo Xtiidz me.

23 Per niicle scaw, telne zob bla zha ne sca gard gliladz Xtiidz me, zobgaa bla zha ne pense rsilo rquiaadiaga, ni csilo to gnee to stib diidz, zeene gan zhow lëetaa mine guiab zho rzhinle guic to sca rac to.

24 Laa telne grëse to no noteed to xtiidz me, nonee to mine racladz me gacnan miech, zha ne sca gard gliladz Xtiidz me, zha ne sca pense rsilo rquiaadiaga, zeene gon zho grëtaa mine nonee to,

haxta ziaa zho biini zien zho ne nli tib miech ngoopdol nac zho.

²⁵ Zigse quianee to laa zdoos zho lozh yguudz, laa zho ted yquitsgzhib zho gnab zho perdon lo Dios; ga guien zho ganle ne nli nacie me to.

²⁶ Bets, bzian, golguien sca zeene ycaalsa to cseed to Xtiidz Dios, zigtaa zha ne goola, zha ne cteed xtiidz Dios, zha ne gnee stib diidza, zha ne gneegaa zha nac diidz co, none tsienie guic zho mine gun zho ga laaw yquiin parne tsogucraa los demas zho zha racladz Dios gban zho.

²⁷ Zeene gnee zho stib diidz, none choptaa zho, tsontagaa zho gneew. None tibga zho gnee, ni rquiin zole zha ne gnee pe nac diidz co.

²⁸ Laa telne guien zha ne grieelo gnee dien pe naca, nodne gnee zhow; mazd len zdoose zho gnee zhow, Diosse gon pe nonee zho.

²⁹⁻³⁰ Scaque zha ne cteed xtiidz Dios, choptaa zho, tsontagaa zho gneew, laa grëraa zha ne ndxie none yquiaadiag zho mine nonee zho. Telne lëëtaque nonee tib zho, ni csiaab Dios guic stib zho gnee, dzigo none cuëz zha ne quianeele ga zeena grieelo gnee zha co.

³¹ Sca none gaca, none tibga tibga zho gnee, zeena grëse zha ne ndxie grieelo gon zho dien pew, parne cseed zho, ni gacnguieelraa zho lo Xtiidz Dios.

³² Zha ne sca rteed xtiidz Dios, none cseed zho gnabey zho zho, cuëz zho nieeda gdziñ hor ne gnee zho.

³³ Sac tel Dios, rdziladz me guiots gnaaz pe cos, rdziladz me ncuaane nzhiitni. Mine rdziladz me

zaacse gac tib cos, ni scagaa run grëraa zha ne no xnëz me.

³⁴ Ni stiba, zeene sca rcaalsa to, racladz naa guien grë men wnaa dzese sob zho. Nodne so zho ye zho gnee, sac gon mgui rnabey zigne zhobneeque lo Xtiidz Dios.

³⁵ Ncuane racladz zho gacnan zho, ro yu ga gnabdiidz zhow lo zha bgui, sac gon, rdzieelda lëëpaaze wnaa gnee zaatne rcaalsa to rquiaadiag to Xtiidz Dios.

³⁶ Zaacse sca golgac, golguien ganle grielod gun to mine notaa guic to, sac gon led loxaque todse nac zha ne runbey Xtiidz Dios, par guiab to zigne racladz to gac tib cos, sca none gaca.

³⁷ Mine rne naa lo to nu xtiidz Dios naca, zha ne rteed xtiidz me lo to i, zha ne rapgaa pe stib guielbiini ne rneedz Espiritu Sant, zha co gunbey ganle nli mine rnabey mew.

³⁸ Zha ne gliladzdgaaw, maase gliladzd zhow.

³⁹ Sca nagon naca. Goltsoxco sca ygaa to guielbiini cteed to xtiidz Dios lo miech, zeena gacnan zho zha racladz Dios gban zho; per scagaa, ib ycade to tel cho zha ne rnee stib diidz.

⁴⁰ Per zigne rne naa ga, grëse mine gun to none zaacse gun tow, tib tiba gacsew hor ne rieguiala.

15

Brieaban Jesús

¹ Bets, bzian, nu laa naa gbire gzet lo to ganle zha nac Xtiidz Dios. Zigne bialseed naa tow, scataque naca; led yeda rdzëë. Lëew ga pcaania to, ni haxta niinagaa rliladz tow.

² Lëew rlu zha grieelo ycaania Dios to, totsaque nli dib zdoo to bliladz tow, ni bii lëëgaaw rnalo to.

³ Zeene bial naa lo to i, pseed naa tow zigne pcaaniase naaw. Gocnan to cho nac Jesús, gocnan to por xtol ne gut me lo cruz, zigne zhobneesew lo Xtiidz Dios.

⁴ Gocnan to ganle zeene goc tson ngbidz pqueets zho me laa me brieaban, zigne raquietaquew lo Xtiidz Dios.

⁵ Leñ dze ne brieabanle me ga, gonlo Pedr me, niicle grëragaa zha ne nacgza Pedr bzënie zho me, gonlo zho me sac güeyted me lo zho.

⁶ Güey me güeyted me zaatne ndxie ndziibsrää gaay gayoo zha ne nole xnëz me, grëse zho gon me; ndal zha co bii mban niina.

⁷ Bded ga gonaque Santiagw me, ni biire güey me lo zha ne bzënie me ga stib;

⁸ goc palal tiempa, lega naclew haxta lo naa brieequia me. Tel naa gon, rrieequia nac naa zig tib mëed ne rzamëed,

⁹ lo grëraa zha ne nac poxtl, ni lalnu peet nond naa, per ni rdzieeld gnee zho naa poxtl; sac gon pa lotaa ptsidil naa grë zha ne glopaa bzëeb xnëz Dios.

¹⁰ Per xquizh Dios tibaque noxco me naa, bzooblo me naa gane laa naa nac mine nac naa niina. Ni led zhlëdgaa bzooblo me naa, sac gon nroobraa xtsiin me noyun naa lo mine noyun grëraa poxtl; per rned naa togo naase quiayuna, sinque me noyacnie naa rrieelo noyun naaw.

¹¹ Laa naa rzet min rii, per nacda par glu dien cho nroobraa noyun xtsiin me, sac mine mazdraa

non nac ne noseed no miech Xtiidz me; lëew biadseed no to, ni bliladzdgaa tow.

¹² Nana sca, racladz naa gnë to dien zha nacne no bla to i rnee nlid grieeban menğut; led wen wen name gocnañ to brieeban Jesús.

¹³ Telne rnee to nlid grieelo grieeban menğut, rrieequia gon rnee to ga nlid brieeban Jesús.

¹⁴ Nana telne brieeband me, paat rquiind mine dzigo noseed no miech nu, zhlëse znu noteed-xtse ne rnalo ne Dios.

¹⁵⁻¹⁶ Rrieequia noquidiee no miech, sac gon tibaque rnee no lo zho bleeban Dios Jesús; ni telne nli rrieeband menğut, ye Jesús dzigo bii noliu me niina.

¹⁷ Stiba, telne nlid brieeban me, zhlëse dzigo rnalo to me ycaania me to; telne nlid brieeban me, scase bii zëeb to grë xtol to.

¹⁸ Grë zha ne bliladz me, zha ne nacle menğut niina, lëe bnitlole zho ga dzigo.

¹⁹ Nana telne loxaque lo guielmban riise nona gnalo ne Jesús, ne dzigo nac miech ne mazdraa nxen.

²⁰ Per gacnañ to sca ganle, i brieeban Jesús! Me nac men ne glopaa brieeban lo grëraa miech guizhiu ne grieeban.

²¹ Grëse ne ne nac ne miech, ible laa ne none guet; sac laa guielgut biaan por mine been Adán; per niina ne laa Jesús biaad, por mine been me grëse menğut laa zho none grieeban.

²² Zigne grëse miech ret porne ziaad zho lo xtii Adán, scaquegaa grëse zha ne gbig lo Jesús, zгаа zho tib guielmban ndzon.

23 Ible sca none gaca, ndion ne ganle laa Jesús brieabanle, ni zeene laa me guiaad, grë zha ne no xnëz me laa zho grieegan.

24 Gal dze co laa me lozh gnitlo mendox ni grëraa ma ne nacie ma, dzigo laa me csan grëse miech ne no xnëz me lадznia Dios men ne nac Pxoз me; dze cotaa nagon laa Dios gun guielwxtis.

25-26 Sac ible Jesús nonabey haxta gdzin dze co, zeene laa me gnitlo grëse meyozh ne rlëë lo me; zig nac guielgut, lëew nac mine lultm gnitlo me.

27 Zigne zhobneeque lo Xtiidz Dios, lадznia me biaan grëtaa ncuaane no; per guiabd ne togo ye Dios no lадznia me, sac gon Dios nac men ne bdeeda lo me.

28 Gacxe waa, zeene gal dze ne laa me sca lozh gnitlo grë zha ne rlëë lo me, Pxoз me nac men ne gnabey lo me; sac gon men co gocnie me been me gan, ni men co nac men ne rnabey.

29 Nana, ne rnee to i nlid rrieegan mengut, ¿pe nac dzigo no zha ne rrobnis xcuent zha ne gutle?

30 Telne niaca mine nlid grieegan mengut, ¿pe nac nadien znu gzataa dze quiabeeladz no no lo grë guielxtseeb?

31 Bets, bziaan, nligaaw tel naa gon gzataa dze noxtseeb naa lo guielgut; nanle to ganle zeene rne naa rleynie naa to, diidzli rnee naa; scaquegaa niina, mine rnee naa nu diidzliw.

32 Ne nligaa zeene glo bial naa guiedz Efés nu, ntseeb goc miech rii lo naa, pale grë ma ntseeb. Telne nlid grieegan mengut, zhlëse dzigo nodeed naa grë min co; mazd tel zhataa dzigo gban ne, zigne rëbaque diidz ne rëb: “¡Golgotsaa dioow ne, golgotsaa dio ne, benque guielgutse quiambiaaz

ne!”

³³ Per lēda ga gon. Zha ne zienal min co, ib yquiaadiagde to xtiidz zho, zeena gacde to zigne nac zho; zigne zēēbaque diidz: “Telne ndzinlid miech ne ctsieelsa luu, zdziñ dze ne gac luu zigne nac zho.”

³⁴ Golquix biini sca, gunctaldraa to xtoł to; pe rtoladzde to, golwi ganle no bla to i gard sēēb xnēz Jesús, haxta ni riend zho zhapaa nac Dios.

Zha grieeban menḡut

³⁵ Nana, no to gnē: “¿Per zha grieeban menḡut? ¿Zhazhe nac cuerp ne grieebannie zho?”

³⁶ ¡Aque nxen wnabdiidz co! ¿Pe rande to zig nac grē midz ne rio liu rac bni, rlozhse rnitlo midz co dzigo laa guizh ne naca ga rlan?

³⁷ Tel rnee to zha nac cuerp ne grieebannie zho, golwi ganle zig nac zhobxtil, zig nac grēragaa midz, ¿pe niacxe zigne nacsew riow liu, scasaque naca rlana? Led zeene laaw rlan, guizhle naca.

³⁸ Tib midzse naca riow liu, Diosle nac men ne rdeed zhiblaga zigne racladz me. Tib tib midz, psanle me dien zha gluw zeene laaw glan.

³⁹ Zigne zhaase zhaase nac tib tib midz, tib tib guizh, scaque nzian lo cuerp no.

Zig nac miech, zhaa nac xcuerp zho lo xcuerp ma, niicle magaaw, zhaa nac xcuerp ma ne no lo liu, zhaa nac xcuerp ma ne no lo nis, ni zhaaque nac xcuerp ma ne rsiibe.

⁴⁰ Grē anjl ne no gbaa, zhaa nac xcuerp zho lo xcuerp ne nac ne miech guidzliu; zhaa nac xquielniow cuerp co lo xquielniow cuerp ne no lo guidzliu.

41 Gotsaa gwi ne ganle, zig nac xbiini ngbidz zhaa naca lo xbiini mēē, lo xbiinigaa mel. Niicle melgaaw, zhaase zhaase nac xbiini ma tib tib ma, no ma palalse rlu, nogaa ma roḷ rna.

42 Scadaa nagon, zhaa rlu cuerp ne rap miech niina, ni zhaagaa glu mine ygaa zho zeene laa zho grieeban. Cuerp ne rdziaap ne niina, ncuane tib rded naca, sanḡue cuerp ne grieebannie ne gaḷ dze co, led yedraa miḅ co nitlo.

43 Mban nac cuerp rii, sac rzacnēw, reta; sanḡue cuerp ne grieebannie ne, tib cuerp ne gdziḅd dze nitlo gaca. Lega zozhidz cuerp rii, sanḡue cuerp co tib cuerp ndip ndaan gaca.

44 Cuerp ne rdziaap ne niina, tib cuerp ngoopdoḷ naca, sanḡue cuerp ne grieebannie ne, miḅ co gac tib cuerp ne gban zigne racladzpaā Dios. Sac zigne znu no cuerp ne rquiin lo guielmban rii, scaquegaa no mine yquiin stib lo guielmban ne gneedz Dios.

45 Goḷsoladz ganle, rnee lo Xtiidz Dios Adán goc miech ne glopaa biaan ni Dios nac men ne bdeed guielmban lo Adán; sanḡue Jesús, me rap guielmban, ni zrieelo gdeed me guielmban co lo miech.

46 Scaque nagon, glo rgaa ne cuerp ngoopdoḷ ne rdziaap ne niina, dzigoraa ygaa ne cuerp ne gban zigne racladzpaā Dios.

47 Gotsaa gwi ne ganle, zeene biaan Adán yudiese bzaa Dios me; sanḡue Jesús, men gbaa nac me.

48 Grēse ne nac ne miech, cuerp ne rdziaap ne lo guielmban rii, zigne gocdaa xcuerp Adán naca; per zha ne gnalo Jesús, zeene laa zho grieeban laa zho gaple tib cuerp zigne nac xcuerp me.

49 Masaque nac ne niina zigne goc Adán, ni

scaquegaa zdziņ dze ne glu ne zigne rlu Jesús.

⁵⁰ Golgacnaņ sca ganle, cuerp ne rdziaap ne lo guidzliu rii, grieelod gdziņa zaatne rnabey Dios; sac rdziņ dze ne rnitlow, grieelod gaca tib cuerp ne guete.

⁵¹ Wen wen golzoobdiag miņe gne naa lo to nu ganle, wlaltaa choot gard gacnaņa: Grēse ne ne nac ne zha ne rnalo Jesús, gaļ dze co zigtaa zha ne mbana, zha ne gutlegaaw ible stsēē Dios xcuerp ne.

⁵² Znuse gac miņ co zig nase zeene riab tib belye; lēē miņ co gac lultm vuelt ne ycuedz xanļ Dios zhitrompet zho. Zeene sedz trompet co, hor co grēse zha gut, laa zho grieebannie tib cuerp ne gdziņdraa dze nitlo; scagaa grē zha ne bii zomban, hor co laa xcuerp zho gdzēē. ¡Grēse ne dziaap tib cuerp cub!

⁵³ Ible sca none gaca, ib none gdzēē xcuerp ne gaca tib cuerp ne xiņd, tib cuerp ne gdziņdraa dze nitlo.

⁵⁴ Zeene gac miņ co, ga grieequia miņe raquiet lo Xtiidz Dios zaatne rnee: “Nasi laa guielgut bnitlo, guielmbanle nac miņe rnabey.

⁵⁵ Ah guielguta, ¿yora na zeene scataa psacsi luu? ¿Yora zeene scataa gocndip xtiidz luu?”

⁵⁶ Grieelodraa pe guņ guielgut ne hor co, sac led yedraa hor co tso doļ, led yedraa hor co gnabey ley; sac por doļ gane rrieelo rsacsi guielgut ne niina, ni por ley rlu pe nac xtoļ ne.

⁵⁷ ¡Xquizh xquielnzaac Dios pxeel me Jesús, sac goņ por Jesús zrieelo griece ne ladznia guielgut!

⁵⁸ Bets, bzian, ne nac to zha ne rleynie naa, golguien sca tibaque dziits golso lo Xtiidz Dios; zig

zie dze gołtsoxcoraa gołgun xtsiin me, beņque naņle to ganle, grēse xtsiin me miņe rdziuun ne nacda ncuaaņe zhlēse.

16

Gon ne guey Jerusalén

¹ Laa zig nac gon ne noyaclo guey gac xyudar grēraa zha ne no xnēz Jesús Jerusalén, laa naa rso diidz lo to zigne psoque naa diidz lo zha Galás.

² Teļ palal run to gan tib leņ zhmal, lo co gołcob miņe ral zdoo to gdeed to gac gon co; gzobse dze gołtsiesana lo zha ne noyunlow. Adel na ganle haxta glansoraa naa i, dzigoraa no to dien zha topa.

³ Ni gołzoobloga dien bla zha ne tsie tsiesana, na zeene glanso naa i dzigo yquia naa tib guits ne güey zho tsiesan zhow;

⁴ ni teļ rquiinpagaa ye naa ga, dzigo na maase ga naa ganie naa zho.

⁵ Leņ dze rii no guic naa gateed naa nēz Macedon, dzigo gale grie naa glanso naa lo to i.

⁶ Nend zbēz naa lo to i palal dze, togo iquegaa teed naa leņ mēē naļ ne ziaad; ni racladz naa zeene gbi naa i, siguiel to gun to xyudar naa teļ pa nēz ne no ga naa leņ dze co.

⁷ Telne zneedz Dios diidz cuēz naa lo to grē leņ dze co, zbēz naa, sac racladzd naa tib guaļteed naa lo to i.

⁸⁻⁹ Niina ne no naa Efés nu, leņ dze riipaa rlu ndal miech ne no liaadz ycaania Xtiidz Dios, gane zbēz naa nu haxta ted lni Pentecostés. Nligaa ndal zha ne no liaadz co, per scagaa ndalaque zha ne rtsidila.

¹⁰ Nacle diidz laa Timoté guiaad i; tel nand new naraa guiaad me, golsiguiel zeene glanso me zaacse golcaania me, zaacse golcuézlo me, zeena tsonley zdoo me; golgan ganle, ye me quiayun xtsiin men ne rnabey ne.

¹¹ Golguien csanwinde to me, sinque golgap me respet; zeena zeene glanso me lo naa nêz rii ine nley gac me csoladz me zha biaadted me lo to i. Laa naa quiambêz glanso me nêz rii, gza me zha ne guiaadnalraa zhits me.

¹² Sangue bets ne Apol, blactaa bnab naa lo me niaadgza me zha ne ziaad i niaadgan me to, per rzac me grieloda niina. Rien naa zeene gdeedtaaw diidz, ible ziaad me ziaadgan me to.

¹³ Bets, bzian, nsin golso, tibaque gonalalo Dios. Ib ctsëede to xtiidz to, tibaque goltsoxco tsienal to mine rnabey me.

¹⁴ Ncuanea guntaa to, golconie guic to gun tow porne rleynie to Dios, porne rleyniegaa to samiech to.

¹⁵⁻¹⁶ Laa naa rso diidz lo to, niowse gon golgac lo grë zha bets ne, zha ne run xyudar to i; zig nac Stef grë menlidz me, golgon xtiidz zho. Led nanle to ganle, Stef nac tib men ne glopaa bliladz Xtiidz Dios nêz Gres i grë menlidz me; ni desde dze co laa me pquiabladz tibaque squi quiayun me xyudar grëraa zha ne no xnêz Jesús.

¹⁷ Rley naa gon zeene gon naa laa me blanso nu gza me Fortunat ni Acaic, haxta stib goc zdoo naa gocnan naa zha no to, masaque gun naa cuent grële lo to ga gon naa.

¹⁸ Ne nligaa bloonley zho zdoo naa, ni rien naa scaquegaa to nley gac to niina zeene gon to zha no

naa. Gol_lguien_l gon_l zha non nac zho, gol_lwi gan_lle pa lotaa nac dziin ne quiayun_l zho.

¹⁹ Grëse zha ne no xnëz Jesús nëz Asia nu, laa zho rxeel_l bdiuzh lo to, gol_lcaania zhibdiuzh zho. Scaque Aquil grop me Priscil, ni grëraa zha ne rcaalsa lidz zho rieseed Xtiidz Dios, grë zho laa zho rxeel_l bdiuzh lo to.

²⁰ Scagaa grë zha ne no nu, ye zho laa zho rquiaabdiuzh to. Zeene ycaalsa to i, ine gol_lnaaznialsa, gol_lqueedzlsa, gol_lcaania zhibdiuzh no.

²¹ Nu laa naa cso schop lan xtidz naa lo to, ni gol_lwi gan_lle naazhal yquiaw:

²² Grëse zha ne gon_l nëd gleyniepaa Jesús, miech ndziibdeele ga nac zho. ¡Ni ile gon_l ziaad me!

²³ Mese nac men_l ne gacniën to, me nac men_l ne no zhixco to, sac ne nligaa rleynie me to.

²⁴ Niicle naaw rleynie naa to, sac gon_l tibaque nac ne ngab ne lo me. ¡Lëed bii gdzieel ne sca!

Pabl

**Diidz ne rdeed guielmban
New Testament in Zapotec, Mixtepec
(MX:zpm:Zapotec, Mixtepec)**

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 18 Apr 2025 from source files
dated 29 Jan 2022

5317ca58-7555-5e4c-a420-e1e9210e2df2